

東
華
續
錄

東華續錄

道光五十四

臣王先謙敬編

臣周瀚恭校

秋七月辛卯諭前據奕湘等奏接據朝鮮來咨內地與朝鮮交界之處近日又有夷人私越邊界墾田摘舍查拏究辦一摺當經降旨將未能實心查辦之將軍禧恩等交部嚴加議處茲據該部議以降級調用奸民越界本干例禁開墾田畝尤屬意在久居爲業宜如何認真查辦乃禧恩履任數年於此等外藩交界經朕特旨交辦之件漫不經心實屬孤恩大負委任禧恩著革去公爵拔去雙眼花翎仍帶單眼花翎降爲鎮國將軍以示懲儆○壬寅上閱吉林黑龍江官兵馬步射○癸卯諭賀長齡奏漢回構隙見辦情形等語滇省漢回夙嫌未釋或獲其同類輒私設牛叢偶有爭

端遊匪懲恤附和往往釀成鉅案自應破除積習永杜釁端著賀
長齡督率所屬嚴禁牛叢力行保甲凡土著民人無論漢回悉聯
爲一體如有外來遊匪卽行驅逐以絕其構煽之端至遇漢回交
涉事件尤當秉公持平一視同仁無分畛域庶令信義相孚猜嫌
悉化以靖邊域儻不能認真辦理事務覈實嗣後仍有滋事之處
惟賀長齡是問○乙巳諭軍機大臣等御史戴綱孫奏河東鹽務
商力已疲請量爲變通一招據奏鹽法之善莫過於民運民銷而
官收其稅河東商力疲敝比以舉報充商大爲閭閻之累請倣照
前乾隆年間河南鹽課改入三省地丁完納舊例酌量變通等語
著吳其濬體察情形該御史所奏是否可行悉心妥議具奏尋奏
河東官地由唐迄今外設禁牆以防作踐內通畦渠以灌鹵泉稍
不完繕淡水滲入則全池之鹵卽行融釋是以附近山溪輒築堰

坡不使涓滴潛注每歲搶修皆係商捐生息所費甚鉅一歸民運
應丁無力修葺不過一二年閒卽成荒灘所產之鹽夾雜硝鹼不
便民食徒棄天產且恐官池委之於民必致無鹽可稅此不敢輕
議改歸民運者也再查三省鹽課攤入地丁全卷止係晉省主議
並未咨商各省以致兩淮天津均以舊鹽充塞大礙官綱至嘉慶
十二年卽復改歸商運是當時草率立案本未周妥以今日山西
情形而論驟攤鹽課二十八萬有奇恐民力不支勢將增累窮黎
且河東之商一聞改法無論殷乏俱存觀望更恐於奏銷大有妨
礙此不敢輕議撥入地丁者也報聞○庚戌諭前據布彥泰奏審
訊首逆胡完供詞與原卷迴不相符一案旋因布彥泰已簡任陝
甘總督特降旨交薩迎阿研訊確情具奏茲據奏稱訊明胡完本
名薩密斯頂並非布孜爾罕亦無從逆情事證據甚爲確鑿是奕

經等審辦此案並不悉心研鞫任聽伯克誣拏教供委員刑偏妄
認幾致誤入叛逆重罪昏聩謬妄莫此爲甚奕經著卽革職發往
黑龍江充當苦差齎清額以專城大臣審轉不實著一併革職發
往伊犁充當苦差賽什雅勒泰隨同會奏並未深究案情亦屬不
合著改爲降三級留任不准抵銷英吉沙爾回務筆帖式富德渾
承審此案率用刑求且於邁瑪特等捏添供詞並不深究著革職
從重發往烏魯木齊充當苦差葉爾羌回務章京西林泰喀什噶
爾回務章京和德那派委會審均未能審出實情俱著革職換防
參將蘇芳阿遊擊馬忠良雖係武職不諳例案究於重案未能隨
同詳審咎亦難辭著一併革職毋庸交部覈議至胡完一犯雖訊
無從逆情事惟據供有酗酒賭博抗欠誣告及姦拐婦女等情邊
疆重地斷難容此不安本分之人著卽定地充軍○致仕大學士

阮元奏謝加太傅銜重赴鹿鳴宴恩得旨覽奏均悉願卿福壽日增以待三赴鹿鳴之盛也○辛亥賞內閣學士德齡副都統銜爲英吉沙爾領隊大臣○是月賑三姓及甯古塔等處水災緩徵江蘇宿遷縣被水灘租

八月戊午諭昨據刑部奏結職官狎優飲酒一案已依議行矣此案各該員以職官恣意遊蕩均屬卑鄙無恥咎無可辭惟案內之王恩祥一員見官翰林平日自宜敦品勵學謹慎自愛乃竟踰閑蕩檢甘蹈狎邪更改姓名尤屬巧詐卑鄙昨經朕簡放學政設使此案倖未舉發尙安望其訓迪有方爲士林表率耶王恩祥行止卑污有玷清班革職不足蔽辜著從重發往軍臺效力贖罪以爲身任詞臣不知檢束者戒○乙丑諭前據薩迎阿奏請添設印房回務章京當交軍機大臣會同該部議奏茲據會議奏稱英吉沙

爾臨邊臺卡甚多地方亦屬緊要自應添設章京以專責任英吉
沙爾著准其添設印房回務章京一員卽專用六部筆帖式毋庸
用起廢人員○壬申諭軍機大臣等寄諭盛京直隸江南浙江福
建山東廣東七省將軍督撫提鎮等耆英奏繕進陸贄守備事宜
狀並練兵儲餉等項事宜一摺練兵儲餉爲邊防要務洵宜準今
酌古實力講求唐陸贄緣邊守備事宜狀一疏於理兵儲餉再三
致意曲盡邊防要領著各該將軍督撫提督等咸錄一通置諸座
右務宜觸目儆心反復尋繹斟酌以求其當變通以適其宜於籌
策邊防自有裨益至各營兵丁技藝之優劣視將弁操演之勤惰
總在勤加訓練將弁得人嗣後廣東水陸各營自副將以下守備
以上著卽責成該提督等督同該鎮隨時考覈果能教練有效兵
丁悅服者據實保舉由耆英覆覈年底密摺陳奏候朕點出一二

員由該督給咨赴部引見聽候擢用此外海疆各省著照此認真
覈辦至儲餉以備非常必須豫籌方免支絀著該督撫等轉飭各
海關該管官嗣後奏報徵收錢糧時計一年稅數贏絀將徵納尾
銀酌留數萬或數千覈定數目奏交各省藩庫另款存貯以資儲
備並著奕湘訥爾經額崇恩按照各該省情形分別輕重緩急酌
量籌辦務令積之永久以裕軍實凡此訓練儲蓄固爲籌邊要術
然總在平日恤之以仁推之以恩要之以信制之以義而復嚴號
令明紀律公賞罰德懷威畏以固結人心振作士氣俾上下一體
有進無退方爲有用之師該將軍督撫提督等務須激發天良深
自刻勵毋稍苟安於弁兵等體恤倍至以實心待之自可得其實
心而緩急可恃矣至各處船隻礮位礮臺陣式一切事宜均宜事
事認真各收實用不得徒事外觀有名無實是爲至要○論本日

布彥泰奏巡邊大概情形等語番匪擾及邊界自應先固藩籬以杜窺伺見據該督相度西甯一帶地勢或因河爲固或扼險設備著卽擇要籌防妥爲布置所有哈喇庫圖爾之南山根南川營之青石坡等處應如何移建營堡及黃河北岸之頭岱東信忙多等處渡口應如何設卡嚴防仍復舊制均著於巡查甘涼肅州等處邊卡完竣後綜覈全局悉心妥議具奏總期訓練認真卡防扼要俾番族無從偷越致有顧此失彼之虞方爲妥善尋奏貴德廳所屬西番往往偷渡河北從前設有防河官兵河勢紆亘固不能周防而有賊渡河可以先得信息卽報察漢托洛亥等防城互爲防範後雖屢次減撤沿河尙有官兵自道光二十三年富呢揚阿奏將防河之兵全數裁撤添設將軍臺會亭子二城專恃防所堵禦遂令聲息難通於防堵並無裨益自宜仍復防河舊章請於察漢

托洛亥等防城駐兵一千二百名內撥出兵六百名再於西甯河
州二鎮添派兵四百名分布沿河扼要之頭岱東信忙多等渡口
派令守備千把等弁分帶嚴密防守仍歸察漢托洛亥駐防副將
統轄又西甯鎮屬哈喇庫爾營所管之南山根南川營所管之
青石坡兩處山勢峻拔爲野番必由總路俱應安兵駐守擬於南
山根安兵一百名亦由察漢托洛亥防兵內酌撥並派千總一員
外委二員管帶輪替駐守其青石坡安兵一百五十名卽由該管
之南川營就近撥派惟南川營額兵無多擬先由西甯鎮標照數
派往亦著派千總外委等員管帶駐守應請於南川營酌添兵二
百四十六名在甘肅腹地事簡營汛抽撥仍歸南川營都司管轄
撥定以青石坡卽作爲該營汛卡以歸簡易新設之將軍臺會亭
子二城應統歸附近之察漢托洛亥防城管轄西甯鎮屬大通永

安等營所管之都濟石打板黑石頭等九處甘州提屬永固協等營所管之扁都口等十一處肅州鎮屬嘉峪關內紅崖等營堡所管之石灰關等大卡十六處涼州鎮屬永昌協等營所管之白石崖等十一處均屬沿邊最要口隘應派弁兵自三四十名至百餘名不等悉令照數派往常川駐守其甘州提屬扁都口外之野馬川卽責成扁都口一帶營卡嚴密防範此外沿邊僻小口隘甚多勢難樂派弁兵駐守查有舊挑坑塹以遏賊馬奔突仍飭令附近汛卡一體嚴防下軍機大臣會同兵部議行○癸酉 上閱火器營兵○甲戌諭賀長齡奏軍犯奮力效誠請援照回疆遣勇將功贖罪成案准其釋回等語所奏甚屬謬妄內地與回疆情形迥不相同在配軍犯自宜嚴加管束不得藉端遽請免罪致使妄生希冀該督總制兩省營伍不惟雲南之兵歸其統轄卽貴州各營亦

無難隨時檄調此次辦理么磨回匪何必藉一軍犯之力練勇相助耶所請著不准行賀長齡辦事毫無見識懦弱無能有負朕望著傳旨嚴行申飭仍交部議處○以賽什雅勒泰爲內閣學士兼禮部侍郎銜

由葉爾羌參贊大臣遷

○乙亥論上年雲南回匪滋事經賀長

齡親往督勦辦理果協機宜何至本年復有蠢動見在雖據該督奏稱連獲勝仗地方安謐惟究未能及早籌防優柔從事致復勞師糜餉已屬咎無可辭甚至以總督重任兩省營伍皆其統轄豈竟調遣乏人轉藉一軍犯之力助勦謬妄無能莫此爲甚賀長齡不勝總督之任雲貴總督著李星沅補授卽馳驛前赴新任江蘇巡撫著陸建瀛調補李星沅未到任以前雲貴總督著陸建瀛兼署俟李星沅到後卽馳驛前赴江蘇巡撫新任陸建瀛未到任以前江蘇巡撫著陸蔭奎署理藩臬兩司卽著派員遞署雲南巡撫

著張日晏補授亦著馳驛前赴新任賀長齡著卽降補河南布政使均無庸來京請訓○丙子諭軍機大臣等賽什雅勒奏布魯特賊匪突入山口搶掠回莊拒殺軍臺弁兵卽時竄匿情形一摺此次布魯特賊匪膽敢擾掠軍臺拒殺弁兵必應大加懲創雖據該大臣等奏稱派兵追剿業已卽時竄匿難保不復出滋擾著該大臣等咨會各城督飭員弁伯克等選派精壯兵丁嚴密防堵如有賊匪竄入務卽認真督剿或設法兜擒或斷其後路總期悉數殲除使該匪等望風懾服儻卽行逃竄不必出卡窮追仍應嚴守卡隘並相度機宜斟酌妥辦被戕弁兵著該部照例議卹所請將伊斯瑪依勒革去伯克及伊斯瑪伊爾革職留任之處均毋庸議其自請嚴加議處亦著加恩寬免該大臣等惟當激勵將弁事事認真既不可過事張皇尤不可稍形疏懈○戊寅諭軍機大臣等

會議賀長齡奏要犯軍前繳械投誠願招餘黨一摺此案回民張富兩次糾眾滋事本屬律不准首茲據帶同夥黨赴營投首並呈繳器械情願招出餘黨籲求免罪該犯張富罪重難追是否果係悔罪出於至誠力求自新之路抑係勢盡援絕窮蹙來歸或另有入懇懇令其投首希圖免罪一時仍難免再行滋事之處著李星沅張日畧到任後嚴密訪查悉心體察據實具奏毋得稍涉含混代人受過儻所查不實別經發覺該督等斷不能當此欺飾之罪也懷之慎之至該犯張富所帶投誠夥黨除馬效青外共有若干名有無著名要犯共繳器械若干亦著於覆奏時一併詳悉聲明

○己卯以李璋煜爲浙江按察使

九月丙戌耆英等奏湖北獲解傳教洋人納巴羅卽陸懷仁訊明實係大呂宋人並無別項不法情事該國並無領事在粵已發交

西洋夷目嚴加管束○己丑諭軍機大臣等據開明阿等奏布魯特賊匪撲卡被擊立即潰散逃竄一摺此次布魯特賊匪復來攻撲卡倫經我官兵奮力攻擊箭射黑衣賊匪落馬得獲勝仗賊匪立即潰散逃竄我兵亦即收撤並無一人受傷辦理尙好惟該賊匪雖已竄逸難保不復出滋事著該大臣等確探賊匪究往何處逃竄抑或屯聚何處一面督飭該員弁伯克等嚴密防堵如有賊匪復來滋擾卽相度機宜認真剿辦務須悉數殲除勿留餘孽儻既經竄逸仍著不必出卡窮追其賊匪中騎黑馬穿黑衣頭目係何姓名務向此次活捉之賊確切訊明並將起釁根由一併根究至我兵箭射該頭目落馬者係屬何人亦著查明據實具奏○壬辰諭漕糧爲天庾正供節經降旨令有漕各省督撫嚴飭所屬早兌早開剋期渡黃毋稍延誤乃近年重運漕船不能如期抵壩以

致到通歸次兌受新漕節節耽延總緣各該督撫不肯破除情面
實力催趲所致見已節逾霜降水勢日消況本年因運河淺阻江
廣各幫卽在安陵剝運抵通更行遲滯若不趕緊催趲及早歸次
儻誤新漕受兌關係匪輕著漕運總督及沿途各督撫分飭嚴催
務使連檣南下銜尾遄行不准片刻停留庶幾以速補遲如期歸
次來年新漕尤當趕緊辦理按限兌開統限於四月初十日以前
全數趲至清江克期抵壩以便渡黃北上毋許稍有延誤儻意存
怠玩視爲具文仍致臨事周章有逾例限定將該漕督及各督撫
嚴行懲處決不寬貸○癸巳以山東歷城等三十縣麥收歉薄命
改徵粟米○甲午諭軍機大臣等有人奏淮鹺積弊亟宜徹底通
籌一摺淮鹺賦甲天下近年以來商務疲累亟宜剔弊懲私認真
整頓著璧昌督同運司體察情形通盤籌畫悉心妥議具奏另片

奏准北票鹽驗貨太盛恐來歲票期無人投納等語亦著該督督率運司詳細確查妥協辦理尋奏查原奏嚴查池私商私減除規費浮費杜奸商之取巧禁蠹吏之舞文皆屬必應革除之積弊業經嚴行查禁至於按商貨以派額引則貨本無由深悉適開巧偽之端令北票兼認懸引則票販來去無常未敢輕爲嘗試其南鹽減運北票納貨以及疲岸改捆中包懸引融網提售原非正辦原奏所指各弊亦宜革除但當此積疲之際不得不權加調劑以甦商困而全大局下部議尋議准該督暫時權宜酌辦仍督同運司從長籌計以期漸復舊規從之○癸卯諭前據璧昌等奏請將江蘇省各州縣歷年墊完民欠懇恩豁免當交戶部議奏茲據戶部議駁請旨飭查勒限追賠等語國家蠲免錢糧總期實惠及民果屬民欠雖鉅萬不惜蠲除如係官虧卽絲毫不容混免官墊民欠

久爲江蘇錮弊此項若邀豁免將來州縣任意侵那毫無忌憚且書役包攬以完作欠種種弊端必致日甚一日著該督等查照上屆部議奏駁原案仍遵前旨不得有官墊民欠名目並迅卽查明原墊及接徵各員按數分賠勒限嚴追儻逾限不完及再有官墊名目卽行嚴參不貸以重帑項而杜侵欺○丁未張日昷丁憂以徐廣縉爲雲南巡撫調傅繩勛爲江南布政使以葉名琛爲廣東布政使服闋布○戊申以程霨采署江蘇巡撫楊殿邦署漕運總督陳孚恩署倉場侍郎由左副都御史署○以李德爲江蘇布政使由順天府尹○是月加賑山東東平萊蕪二州縣災民賑三姓琿春水災旗民給山東汶上等四縣災民口糧蠲緩奉天遼陽等十三州廳縣直隸霸州等三十五州縣山東東平等四州縣災歉新舊額賦展緩河南尉氏縣水災額賦三姓琿春旗民貸穀逋穀

冬十月丁巳以文俊爲奉天府府尹兆那蘇圖爲直隸按察使

陝西

道

○免勦番官兵駐紮之黑錯四溝番民額賦○丙寅諭柏

棧等奏請將江蘇省完漕大戶小戶等名目槩行禁絕等語據稱查明江蘇向來完漕紳富謂之大戶庶民謂之小戶以大戶之短交取償於小戶因而刁劣紳衿挾制官吏索取白規大戶包攬小戶小戶附託大戶又有包戶之名以致畸輕畸重眾怨沸騰紛紛滋事又旗丁津貼原有定額近來總以米色爲詞多方挑斥逐漸加增是幫船多取一分於官州縣卽多取一分於民種種弊端關繫非輕若不及早整頓貽患何所底止著兩江總督江蘇巡撫認真查察所有前項大戶小戶包戶各名目槩行禁絕一律均收尤不准旗丁額外多索幫費儻敢抗違不遵或州縣中竟有浮收入己情事卽行據實嚴參從重治罪毋稍瞻徇以肅漕務而清弊端

○周之琦以病免以徐繼畲爲廣西巡撫陳慶偕爲福建布政使

徐思莊爲山東按察使

由雲南進東道遷

○壬申命前任左都御史沈岐

以原品休致○甲戌諭軍機大臣等前因各省議覆銀錢兼用章

程或請分別款項按成搭放或稱諸多窒礙請照舊章應經批令

依議辦理並交軍機大臣會同該部議奏茲據奏稱福建省前奏

未盡事宜請飭從長計議江蘇各省亦令一律查辦並山西巡撫

請禁空票之處亦應令其自行妥辦各等語均已依議行矣惟是

銀貴病民所關匪細必應力求通變前降諭旨甚明乃各該督撫

之已經議覆者率皆無可通變卽所請按成搭放之處爲數亦屬

無幾於銀貴錢賤殊未足以資補救其尤甚者河工人員但知用

銀甚便總以搭錢爲難卽謂歲修工程及豫購稽料土方等項責

令以錢搭放恐致貽誤要工此外俸廉盤費書吏倉役並雜交等

款何難量予搭放仍著各該河督按照前項名目悉心覈議每年實可用錢若干分晰奏覆毋得固執成見仍以窒礙難行一奏了事其未經奏到之河南陝甘雲南等省亦著各該督撫通盤籌畫總期銀錢兼用於收放並權之中作推行盡利之計以濟民生而裕國用是爲至要尋江南河道總督潘錫恩奏河庫額支俸廉書吏役食盤費雜項暨江甯藩司轉解武職養廉均擬按銀七錢三搭放以制錢一千五百文作銀一兩各廳自運並轉運蕩柴水腳及津貼船兵水腳三項亦擬搭錢三成又各廳經費除撥歸心紅額銀外餘擬全數以錢抵放計每年可用制錢十萬千文河東河道總督鍾祥奏東河並無盤費一款請仍照舊章辦理惟土工有用錢成案嗣後請以錢三成搭放計每年估修土工以三十五萬兩爲率可搭用錢十五萬串以制錢一千五百文作銀一兩均下

部知之○乙亥以楊以增爲陝西布政使蘇敬衡爲甘肅按察使

由廣東雷
頭道遷

○庚辰諭軍機大臣等賽什雅勒泰等奏布魯特賊首

遠竄餘黨渙散見在撤兵一摺布魯特賊首的瓦年前經撲卡滋

事被官兵擊退見在雖已遠竄餘黨潰散官兵撤回惟回蹤詭秘

難保不故智復萌再行滋事著嚴飭各城及守卡弁兵認真稽查

黨的瓦年再有潛赴該處之事卽行拏解究辦毋令竄逸至該賊

首此時如果遠遁不值派員各處偵探蹤迹轉涉張皇前奏奇盤

莊明巴什差人與的瓦年送馬之語見旣查明係屬訛傳著毋庸

議另片奏防堵等費該大臣等捐廉墊發等語此項防堵各費俱

著准其作正開銷造冊報部○辛巳諭耆英等奏見辦緝捕情形

等語廣東地方盜案疊出節經該督撫等嚴行懲辦仍復盜劫頻

聞非遴委明幹大員認真查辦保甲不足清姦究托足之源著卽

派委督糧道黃宗漢會同藩臬兩司各巡道妥議章程一面督飭委員並地方各官實力編查按戶造冊責令連環保衛毋令匪徒涸迹至各縣水陸交界地方此拏彼竄幾爲逋逃淵藪尤宜加意巡哨亦著專派知府大員隨同臬司嚴飭地方員弁添設巡船勤加會哨斷不准意存畛域互相推諉該督撫等惟當督飭該道府率同員弁實力稽查認真哨緝務期有案必破有犯必懲淨盡根株以除擾害而安良善儻各員弁因循怠玩並不實力奉行及該管文武畏葸聞葺著卽從嚴參辦毋稍姑容○是月給河南汲縣等八縣陝西府谷神木二縣災民口糧蠲緩湖南澧州等五州縣暨岳州衛被災額賦緩徵山東濟甯等七十州縣衛江西奉新等二十五縣安徽壽州等四十州縣衛河南睢州等四十三州縣陝西華州等二十六州廳縣被災額賦兩淮泰州海州十四場水災

地課

十一月戊子諭前據潘錫恩奏中河廳估建滾水石壩並拆修雙金閘要工一摺當交戶部議奏茲據該部奏稱滾水壩爲漕船往來要道且事屬勦建應准其撥銀十一萬兩責令該河督趕緊興辦無誤漕行至拆修雙金閘一款此項工程曾於道光十四年經張井奏請估修戶部駁令歸入常年另案款內動用該河督自應遵照前案不得再行請撥致滋糜費嗣後如有應修各工若非必須請撥之項著一槩裁歸常年搶修項下報銷以符定制○乙未

上詣 大高殿祈雪○甲辰諭軍機大臣等賽什雅勒泰等奏巴達克山部落帶兵掇獲布嚕特賊匪遣使遞稟一摺此案賊首的瓦年等逃至哈巴依塔拉地方欲往巴達克山什克南等處藏匿情形先經該大臣等探明具奏茲復據奏稱見有什克南伯克

阿布都熱依木差額爾沁庫爾班前來遞稟詢據聲稱前聞奈曼等愛曼布魯特將的瓦年稱爲和卓在各城滋事因此巴達克山什克南兩處伯克會同帶兵至木洛阿比地方分兵搶奪各愛曼將的瓦年並朵斯巴依及其家屬均已擒獲因差派庫爾班帶朵斯巴依同來回話行至格孜地方朵斯巴依乘閒走脫改遣阿布都拉帶路來城等語該夷等既將賊匪搜擒並未卽時獻出且任聽賊目朵斯巴依中途走脫是其有無緝獲究未得實見經該大臣等重懸賞格令其將賊匪解送將來如果解到所有的瓦年等犯務當反復究詰總期確鑿有據毫無可疑方可分別定擬儻稍留疑竇致使已定重罪之犯覆訊並非其人實屬不成事體該大臣等其各詳慎毋忽是爲至要○丙午諭京倉收貯歲清穀石自有一定額數以收抵放原屬有贏無絀本日戶部奏比較歲清數

目開單呈覽朕詳加披閱近年漕糧運京多有短少本年尤甚較之全漕短至一百萬石蘇松江安兩糧道起運尤屬不敷見屆開徵兌漕之時著通諭有漕省分各督撫自今年爲始漕糧一經徵齊卽將該省額徵若干本年起運若干緩缺若干逐一比較上三屆數目據實奏明迅卽造具清冊報部俾得豫先覈計不得沿向來舊習於開兌以後始行咨報儻比較有減無增卽由該省設法立將短數補足起運方不至有誤支放並著漕運總督一體遵照悉心籌畫實力稽查總期漸除積習按額收倉庶漕政可肅而積貯常充矣又片奏前經奏准勸諭商人買米由海運津官爲收買見在有無領運之商未據奏報著兩江總督江蘇巡撫劉切曉諭以此次商運米石一經到津特派大臣前往剋期收買該處地方市僧人等槩不經手俾各商咸霑利益毫無阻滯如有運米較多

之商一俟收買完竣後該督撫卽查明奏懇獎敘候朕施恩其商
運米船著查照道光六年海運章程每米船准其八成載米二成
載貨由該海關查明免稅放行以恤商情而廣儲備○諭軍機大
臣等寄諭兩江總督璧昌署江蘇巡撫程喬采漕糧爲天庾正供
支放攸賴每歲京倉應放俵米甲米各項共需漕糧三百數十萬
石顆粒不容短少亦不能暫緩時日太倉舊時積蓄因歷年漕糧
短額均已動放無存覈計各倉見存糧數僅可放至新漕抵通之
時是明年漕糧必需四百萬石至少亦需三百七八十萬石方足
以敷支放近年以來各省歲運額漕逐年短少江南一省江安蘇
松兩糧道所屬緩缺尤多似此有減無增年復一年伊於胡底且
以京師官兵俸餉立待發給之款儻因漕糧缺額以致發領不能
足數彼時卽將該督等加以重懲亦豈能補救萬一朕軫念民隱

凡各省奏請蠲緩無不立沛恩施江南地方近年卽有偏災朕亦不必遽疑爲捏報惟本年懇請蠲緩者竟至五十餘州縣之多或因辦理漕務兌費繁重藉此爲體恤地方之計豈竟置京倉於不顧耶因思海運章程道光六年辦有成案見當整頓漕務清釐幫費之時著該督撫通盤籌畫如可依照前章確有把握卽統覈漕糧實數每歲酌分幾成改由海運於道光二十八年爲始庶漕費可以節省而州縣等亦不至藉此捏報災荒致虧倉貯至招商買米由海運津事宜已妥立章程籌款備買此外凡有可以實裁幫費籌補額漕之策亦著該督撫等悉心籌度迅速奏明請旨至見經降旨緩徵地漕究竟確數若干並見徵實數若干著卽查明迅速報部以備稽覈其南米兵米如有災缺例應碾動常平倉穀或於附近豐收地面採買槩不准率請截留漕糧致缺京倉放款該

督等既爲大清之官不顧大清之事試問是何人耶能否激發天
良妥籌善策繁費何以裁汰正額何以充盈務各竭力殫心詳慎
籌議迅卽具奏以慰朕懷儻經此次諄諭之後該督等仍敢狃於
積習貽誤倉貯要需國法具在噬臍何及勿謂言之不豫也尋璧
昌等奏見當徵兌之初飭令各府州督屬認真釐剔均平徵收並
將幫費酌量減除至商船運米赴津已據認有成數似可源源販
運本年江蘇緩缺兵匠等米另議撥補不准截留漕糧其酌定成
數海運及籌補額漕之策容通盤籌畫再奏得旨勿稍存畏難之
見努力而行○丁未諭軍機大臣等前據劉韻珂等奏臺灣生番
獻地輸誠請歸官開墾一摺當交大學士軍機大臣會同該部議
奏茲據會議具奏該番性類犬羊羸居崖谷忽因衰弱窮困獻地
投誠懇請官爲經理恐有漢奸懷詐挾私潛爲勾引一經收納利

之所在百弊叢生有非豫料所能及者此事大有關係著該督於
明年二三月渡臺後將該處一切情形履勘細加體察籌及久遠
據實奏明未奉諭旨之先不准措辦斷不可輕聽屬員徇憑以爲
邀功討好受其蒙蔽率行議准致貽種種後患○己酉諭黃恩彤
奏應試年老武生三場完竣請賜職銜一摺所奏甚屬冒昧國家
設科取士原屬文武並重惟每屆鄉會榜後查明年老諸生賞給
副榜舉人及司業檢討等職銜則專爲文場而設與武生專較年
力者不同黃恩彤既知向無賞給年老武生職銜之例乃必欲飾
詞陳請是止知見好沽名受人蒙蔽甘置舊章於不顧儻各督撫
相率爲僞競尙虛文於政事有何裨益所奏斷難准行黃恩彤違
例妄請大失朕望著交部嚴加議處以爲市恩邀譽者戒○辛亥
諭軍機大臣等有人奏山東盜賊公行請旨飭拏一摺山東地方

向無擄人勒贖之事茲據奏本年十月間該省嶧縣蘭山等處盜劫頻仍並有擄人幼子勒贖錢文之案且該兩縣竊賊甚多著名頭目糾合多人擾害閭閻與捕役聲氣相通是以無從究辦等語盜賊肆擾擄人勒贖與捕役包庇養奸最爲地方之害不可不嚴行懲創著崇恩嚴飭地方官按名嚴密查拏盡法懲治毋任一名漏網至捕役包庇賊匪種種弊端實爲盜源該撫惟當審加體訪如果實有其事立即查拏嚴辦庶捕務日有起色而宵小自可斂迹矣○是月賑山西垣曲縣災民蠲緩山西保德等六州縣暨歸化城等三處浙江餘杭等四十四縣衛直隸安州等六州縣被災新舊額賦緩徵山東范縣暨屯衛江蘇泰州等六十五州廳縣衛甘肅河州等十六州廳縣災民新舊額賦展緩湖北沔陽等二十七州縣衛被災逋賦

十二月癸丑諭昨因黃恩彤違例妄請賞給年老武生職銜飾詞
瀆奏市恩邀譽當降旨交部嚴加議處並諭兵部查明定例據奏
稱武生武舉年逾六十者停其咨送鄉會試乾隆九年十八年經
該部先後議覆將博多倫條奏嚴定章程六十以上者不准入場
等語茲據吏部照妄行條奏例從嚴議以降三級調用武生符成
梅見年八十四歲照例本不應收考黃恩彤濫准入場已屬違例
且身爲大吏止知見好於人擅開例制代乞恩施尤爲謬妄黃恩
彤著卽行革職交耆英差遣委用所有該武生符成梅六十以後
各科違例送考收考之各學政巡撫並著該部查取職名嚴加議
處○調徐廣縉爲廣東巡撫以程爾采爲雲南巡撫楊殿邦爲漕
運總督陳孚恩爲倉場侍郎由左副都御史遷○己未徐士芬以病免以
李煌爲戶部右侍郎署吏部左侍郎○辛酉尊封 仁宗睿皇帝 如貴

妃鈕祜祿氏爲

如皇貴妃晉封琳妃烏雅氏爲

琳貴妃成貴

人鈕祜祿氏爲

成嬪○癸亥諭軍機大臣等陸建瀛奏委員查

辦邊境遊匪滋事及籌撥經費一摺雲南大小猛統地方遊匪藉稱挾道光十九年客民械鬪之嫌膽敢糾約一千餘人闖入緬甯界內滋事實屬腎不畏法且難保無另有匪徒勾結遇事挑釁亟應大加懲創見據陸建瀛飭委知府寶俊參將伊昌阿馳往會同鎮道查辦並飛咨署提督察看情形親往督剿李星沅見已抵任著卽督飭該員等趕緊兜拏實力勦辦務須迅速肅事淨絕根株毋使滋蔓其所請經費著准其於邊費項下動撥銀一萬兩解往備用如竣事較速仍卽繳還庫貯至署提督蔭德布如已親往督辦能否勦捕得宜且於此缺是否勝任著李星沅詳細察看據實具奏毋稍徇隱○乙丑諭軍機大臣等本日據李星沅奏原辦回

務大概情形並見在籌勦緬甯回匪一招雲南漢回積怨報復大而械鬪小而焚劫幾至無歲不有該督著卽詳加體察悉心酌辦儻賀長齡從前辦理不善卽著據實嚴參毋稍徇隱至此次緬甯之擾與永昌前案有無牽涉並雲州處決人犯突被回匪打奪是否卽係緬甯匪徒抑或另有勾結均須徹底查明逐一根究回匪張富投誠是否出於真心尤須訪查確實迅速具奏再見在勦辦緬甯匪徒該督卽飭臬司普泰前往堵緝如一時未能肅事卽著李星沅馳赴該處相機妥辦總期趕緊撲滅毋留後患○以彭蘊章爲左副都御史由宗人府府丞遷○丁卯吳其濬以病免以王兆琛爲山西巡撫陳士枚爲四川布政使周開麒爲福建按察使降調甘肅布政使○己巳雲貴總督李星沅奏見查緬匪滋事嚴速勦辦得旨辦此等事切忌諱飾玩愒務當嚴加整飭妥速而行勉之又奏謝兼

署巡撫恩批當今之弊總在蒙蔽不實處處皆然深堪痛恨卿其
努力以副簡任○庚午諭御史德奎奏請釐庶獄一摺京師入冬
以來雪澤稀少疊經降旨祈禱迄今未得優霑見在節屆立春農
田望澤彌殷朕心尤深焦切茲該御史奏請清查直隸一省庶獄
冀得感召和甘因思直隸各州縣得雪未能深透山東山西河南
陝西甘肅各省均屬苦於乾旱之區自應一律推廣著刑部堂官
督飭承審各司員將見在交部各案認真細心推鞠如有冤抑等
情迅卽覈辦並將直隸山東山西河南陝西甘肅各省及部中見
擬軍流等罪已未到配官常各犯詳查原案擇其情有可原者開
單具奏候朕量加寬宥至刑部收禁人犯若因未經定案久繫囹
圄疾病顛連情殊可憫著該部審度案情其有問徒以下輕罪人
犯及干連待質例應取保候審者立予清理省釋毋稍稽滯此外

尋常案件並著速行審結不得遷延羈禁以示矜恤而迓祥和○

召寶興來京賞琦善二品頂帶爲四川總督以斌良爲駐藏辦事

大臣

由刑部右侍郎選

○前任山西巡撫吳其濬卒贈太子少保予祭葬

○辛未以全慶爲刑部右侍郎

由內閣學士遷

○調周開麒爲直隸按察

使兆那蘇圖爲福建按察使○丙子調鄭祖琛爲廣西巡撫徐繼

畚爲福建巡撫○丁丑琦善奏披楞卽英吉利國見戰勝森巴並

森巴所屬之拉達克克什米爾地方俱已歸披楞管轄報聞○是

月給浙江縉雲宣平二縣水災口糧緩徵浙江甯海等七縣暨屯

坐各衛水旱災新舊額賦並青浦等五場旱災竈課○是歲朝鮮

琉球入貢○會計天下民穀數除福建省暨臺灣府淡水等七廳

縣未經咨報外各省通共大小男婦四萬二千一百一十二萬一

千一百二十九名口各省通共存倉米穀三千二百四十九萬三

千三百一石五斗六升七合八勺

東華續錄

道光五十五

臣王先謙敬編

臣周澐蕃恭校

道光二十七年丁未春正月丁酉朱士達原品休致以唐樹義爲
湖北布政使調嚴良訓爲陝西按察使李璋煜爲廣東按察使用
祖植爲浙江按察使以宮慕久爲江蘇按察使由蘇松太道遷○辛丑諭
戶部奏珠爾山開荒地畝請照涼水泉舊案停止認種一律封禁
一摺吉林一帶地方爲根本重地官荒地畝不准開墾例禁禁嚴
所有珠爾山開荒地五萬六千餘晌除見在招墾地二千六百二
十六晌既經查明各個花費工本姑准墾種交租外實贖閒荒地
五萬三千三百七十四晌自應查照涼水泉地畝封禁原案畫一
辦理著該將軍副都統親往各該處通行查勘此外尙有存贖閒

荒共若干萬畝一律自本年爲始各於扼要處所趕立封堆永遠禁止毋任彼此影射稍涉含混以致有名無實並令各邊口嚴遏流民毋許闖入嗣後儻再有展越偷種情弊除該地方官從嚴懲辦外定將失察之將軍副都統一併嚴行懲處以肅官常而昭法守○壬寅雲貴總督李星沅奏緬匪聚散無常不值勞師糜餉擬行團練之法人自爲衛農卽爲兵既有裨於邊備仍無藉於軍需得旨所見極是妥實相機而行○是月給浙江富陽等六縣衛安徽五河等三縣江蘇桃源等五縣衛上年災歉口糧河南河內等十三縣水旱災口糧籽種並貸輝縣等八縣倉穀貸陝西葭州等三州縣直隸霸州等三十九州縣災歉籽種口糧倉穀緩徵山東德州等五十州縣衛直隸霸州等三十九州縣災歉新舊額賦展緩浙江富陽等十二縣水旱災逋賦山東鹽商課

二月辛亥朔諭軍機大臣等昨據奕湘奏請欽派大臣查勘山場一摺已有旨派柏葰等會同奕湘前往履勘矣此案流民越界潛往江邊墾田構舍疊經降旨令奕湘等派員按查嗣據奏稱拏獲各犯分別懲辦並經朝鮮差官眼同委員平毀田舍完結惟原指毀江西岸四十二處私墾田地若干畝構舍若干間居民男婦若干名口經此次嚴行驅逐是否實無寸椽尺土仍留該處柏葰等接奉此旨務當會同奕湘前往逐細詳查有無不實不盡並如何明定章程嗣後不至再有流民潛往構舍墾田之事尤當悉心妥籌務收實效儻敢意存遷就扶同諱飾將來或復經該國咨請查辦或別經發覺定將該侍郎等一併治罪決不寬貸至所請東邊卡倫十八處應如何扼要設卡派兵稽查自當通盤籌畫務期得力著專交該將軍副都統等相度情形妥議具奏毋庸與柏葰明

訓會商辦理也○壬子 上御經筵○己未諭軍機大臣等李星沅奏官兵籌剿雲南回匪情形一摺雲州回寨匪犯拒捕恃險負隅不法已極雖據稱殲斃五六百名並捆獻劫囚重犯交出夥犯及礮械等件而藏匿寨外勾結人數尙多若非實力痛剿示以兵威遷就於目前必致貽患於事後該督等著卽嚴飭鎮將激勵軍心力加攻剿斷不可因獻出數犯收繳器械數件遂信爲賊勢窮蹙又復將就了事儻官兵甫撤而匪徒滋擾如前豈不又墮奸計耶至前次緬甯散匪逃入猛統地方仍當偵探賊蹤密速堵緝如敢別圖竄擾卽移兵練追擊嚴加懲辦提督蔭德布能否實力剿辦如有稍涉畏葸退縮不前之處卽著據實嚴參毋稍徇隱○壬戌雲貴總督李星沅奏緬匪已聞風散匿其拒捕之回匪見督官兵上緊剿辦得旨一鼓作氣最忌姑息醜類務盡殲除毋留後患

勉之○癸亥以鄭親王端華為御前大臣○以熙成爲內閣學士

兼禮部侍郎銜

由鴻臚寺卿遷

○庚午賀長齡以病免以王簡爲河南布

政使吳式芬爲河南按察使

由廣西右江道遷

○壬申諭致祭文廟儀

注乾隆年間曾將一揖之儀奉

旨更正嗣後儀注內如何改定

見在自行一叩禮係何年添出著禮部詳細查明具奏○癸酉允

陸建瀛等奏挑築六塘河各工○乙亥以內閣學士慶錫爲馬蘭

鎮總兵官○丙子諭軍機大臣等向來閩海關徵收課稅從無短

缺乃自近年以來據報徵收數目每不足額是否敬敷未能認真

稽覈或用人不當致有偷漏等弊或任聽胥役串通蒙混種種侵

蝕恐皆不免著劉韻珂接奉此旨隨時留心密加訪察如查有前

項情弊卽行據實具奏斷不准稍涉瞻徇尋奏遵查閩海關稅務

雖分六口而廈門一口向居稅額之半廈門販海之船有透北過

臺出洋廣撥四項貨船自五口通商以後洋船所販之貨卽係出洋廣撥兩項船隻所販之貨以致出洋廣撥二船收帆歇業洋稅日增常稅日絀擬將洋船所占華商進口洋貨棉花布匹出口雜貨等稅撥歸閩海關常稅徵報其洋船進口噸錢出口茶葉湖絲各稅仍歸洋稅徵收下戶部議尋議洋稅撥歸常稅恐洋稅所徵無幾請令於每年洋稅項下撥補常稅銀若干兩酌定數目奏聞從之○丁丑諭禮部奏遵查致祭 文廟禮節除一揖之文業經刪定其見在自行一叩禮係何年添出查無確據等語致祭 文廟典禮攸關嗣後行禮究應如何畫一之處著禮部詳覈妥議再行具奏尋議上得旨除刪去自行一叩禮外餘著照舊儀辦理○戊寅 上啓鑾謁 東陵○免經過地方額賦十分之三○諭行在滿鑾儀使玉明聯順俱著賞穿黃馬褂嗣後滿鑾儀使著永遠

爲例○是月給河南汲縣等五縣被災口糧並緩徵新舊額賦

三月辛巳 上謁 昭西陵 孝陵 孝東陵 景陵 裕陵回

鑾○癸未諭李星沅奏官兵圍剿回匪首要各犯續行拏獲勒交餘匪漸就肅清一摺所辦甚好可嘉之至滇省回匪由緬甯竄入雲州勾結拒捕節被攻擊獻出重犯復經該督嚴飭密速勒拏首犯卽據續獲要犯多名又據回寨續交指拏首犯馬登霄一名餘仍延未交出該提督等復行督勦殲斃無算賊營驚潰該案矜者等疊次詣營泣訴旋續拏到馬惲海海連升兩犯又設伏生擒馬效青一犯張富已據供被傷致斃著名首惡見已一律殲滅餘匪漸就肅清李星沅調度有方辦理迅速著賞加太子太保銜並賞戴花翎以示優獎所有在事出力文武員弁著擇其尤爲出力者據實保奏候朕施恩母許冒濫○諭李星沅奏遵旨確查原辦回

務實在情形一摺覽奏均悉此次殲擒雲州回匪多係永昌前案
逸出之犯是該匪等反覆滋擾顯因上屆辦理回務之告病道員
羅天池未能詳慎區分率行掩捕以致衆回寒心有所藉口實屬
貽誤大局前任雲南迤西道告病回籍之羅天池著卽行革職永
不敘用以爲輕發躁妄者戒賀長齡於羅天池接殺過多託病以
去並不從嚴參劾止請撤銷議叙又率准張富等投誠代請免罪
種種謬妄實屬辦理不善亦著一併革職○乙酉 上幸南苑行
圍○丙戌耆英等奏英人藉詞被華民欺陵之嫌輒帶領兵船突
入省河在十三行灣泊並令洋兵潛上礮臺釘塞礮眼先經委員
探詢復前往面見據稱欲往佛山與華民較論並堅請卽行進城
見在嚴防酌辦○戊子 上還京師○己丑耆英奏此次英人突
入省河其堅求不已者尤在究辦佛山毆逐洋人之華民及准伊

等進城二事見已委員馳往佛山將當日在場開關之匪徒關亞
言等拏獲懲辦釋其嫌怨其進城一節亦經委員反復開導寬其
日期其餘所請租地建房等事均經按照條約次第妥辦見在洋
船陸續退出○乙未以璧昌爲內大臣調李星沅爲兩江總督以
林則徐爲雲貴總督楊以增爲陝西巡撫恒春爲陝西布政使劉
源灝爲山西按察使

由山東鹽運使遷

○戊戌耆英等奏洋船一律退出

虎門省城安靜如常○庚子諭從前鄉試回避士子雍正年間曾
於內閣另行考試或將試卷另封進呈派員校閱均係出自特
恩並未著爲定例迨乾隆年間即經先後停止嗣因御史睦朝棟
率行陳請瞻顧徇私當奉 嚴旨將該御史拏交刑部治罪至嘉
慶四年復有御史郭儀長條陳此事經部議准仍奉 特旨駁飭
是回避士子另行考試事屬難行疊奉 聖訓昭垂豈容臣工任

意瀆請祝慶蕃見任禮部尙書明知此事早經停止乃因本科回
避士子人數較多獨出己見率行面奏實屬沽名釣譽冒昧瀆陳
著交部嚴加議處嗣後鄉會試回避士子無論人數多少其另行
考試之處並著永遠停止○壬寅諭廉敬等會奏籌議乍了地方
控案設法曉諭一招乍了爲西藏進出要路前因控案未結降旨
令該督等會同籌議揀員曉諭以止爭端茲據奏稱該兩造均有
不合空言開導恐難望其懾服自應勸戒兼施使之迅速就範該
督等業經就商上所屬及土司管轄附近乍了之土兵分飭豫備
揚言進剿使知儆懼仍專派噶布倫汪曲結布直至乍了向兩造
喇嘛詳晰開導並曉諭夷民隨宜懲戒相機酌辦著卽照議妥辦
總期夷情帖服道路常通是爲至要再川省無藉棍徒糾搶本名
啞嚕嗣因具摺率寫啞匪字樣乾隆年閒奉 旨改正嗣後遇有

此等案件著仍遵照改爲咽喉匪犯不得率寫咽字○乙巳諭前
因祝慶蕃以本科回避士子人數較多率請另行考試冒昧瀆陳
當交部嚴加議處茲據該部議以降三級調用因該員任內有革
職留任之案照例卽行革任等語祝慶蕃著加恩改爲降二級調
用○以魏元烺爲禮部尙書賈楨爲左都御史調孫瑞珍爲戶部
左侍郎轉趙光爲兵部左侍郎以朱鳳標爲兵部右侍郎由內閣學士遷
○是月緩徵陝西乾州等二十三州縣旱災額賦山西保德等九
州廳縣逋穀湖北荊州等五衛貸款

夏四月癸丑雨

○丁巳諭鑑以病免以靈桂爲盛京兵部侍郎

由左

副都御史遷

○戊午諭軍機大臣等賽什雅勒奏奏巴達克山等伯克

前次帶兵擒獲布魯特賊匪的瓦年及朵斯巴依並未卽時獻出
又任聽中途走脫各情今經查詢該夷果以空言塞責詞已遁窮

等語夷情貪得無厭若索之太急彼必據爲奇貨況的瓦年等釜底游魂亦不值偏令獻出卽此後竟不解送亦無須懸賞向索既經該大臣等撰給回諭仍著體察情形相機妥辦以消夷釁而慎邊防○賽什雅勒泰等奏披楞卽英吉利回語呼爲排嘐向與音底接壤見在訪聞排嘐已將音底占據駐兵努普爾地方雖推依博特克什米爾之歸附與否尙在疑似之間而音底見無總目各部落多屬排嘐其說未必盡皆附會報聞○庚申以載堪爲內閣學士兼禮部侍郎銜由乾清門三等侍衛遷○壬戌雪貴總督林則徐奏由四川取道前赴新任得旨長途善養以副簡任○己巳以孫葆元爲內閣學士兼禮部侍郎銜由詹事遷○癸酉賜張之萬等二百三十一人進士及第出身有差○是月貸江西上新昌二縣湖南鳳凰等五廳縣屯丁苗佃籽種口糧緩徵陝西神木府谷二縣旱災

額賦山西吉州等九州縣逋賦

五月庚辰以桂德爲左副都御史

由通政使遷

○癸未諭軍機大臣等

前因給事中朱昌頤奏江省奏報緩徵似未確實當有旨交陸建瀛逐件確查據實具奏茲據奏稱該省奏報稽遲雖辦理難免參差尙非有心弊混各等語江蘇吏治疲玩相循雖據該署督查明上年奏報緩徵尙無不確不實情弊惟事關國計民生以後遇有災歉該督撫惟當飭屬速詣詳勘並令道府覆勘如有未盡確實之處卽責成藩司抽查重則親往查勘斷不可任聽屬員蒙混稟報率准請蠲請緩儻竟有捏增分數那移地段等弊卽行從嚴參辦以滌積習而重正供又另片奏上年緩缺漕糧無可籌補擬俟秋成後責令各屬帶徵起運卽民力閒有拮据亦當酌量情形分年展帶等語此項短缺額漕於京倉積貯大有關係既據該署督

卷一百一十五 七

酌請帶徵起運仍著該督撫認真覈實依限帶徵總期缺額於前者皆可歸補於後不至有名無實是爲至要總之國家歲徵漕賦於正供外並無絲毫多取小民食德服疇何至抗不交納良由不肖州縣捏飾弊混該督率請蠲緩年復一年以致京倉存米不敷支放不得已議行採買並捐米接濟左支右絀伊於胡底儻該大吏等仍不激發天良力圖補救試問所司何事能勿覲顏耶○丙戌 御試翰林詹事等官擢王慶雲等四員爲一等餘升黜留館有差○何汝霖丁憂調魏元烜爲兵部尙書以賈楨爲禮部尙書孫瑞珍爲左都御史山戶部左侍郎遷○丁亥諭向來翰詹衙門遇有滿洲翰林缺出先儘內班升用內班無人例用外班充補及至考試詩賦多非素習以致未能前列充補後旋即改官殊非造就人才本意因思繙譯爲滿洲本業均應隨時學習精熟毋稍荒廢見在

每科繙譯會試獲雋者止用部屬升途較隘若將此項人員轉入翰詹衙門令其專心學習繙譯與各員一體升轉遇有考試翰詹之年卽照向例考試繙譯免致舍其所長用其所短似足以收實效其如何分缺錄用之處著大學士軍機大臣會同吏部妥議章程具奏至蒙古繙譯進士以主事用者得缺較難如何疏通俾無積滯亦著一併議奏以示朕鼓勵人材成就後進之至意○轉李煌爲戶部左侍郎調朱鳳標爲戶部右侍郎以黃琮爲兵部右侍郎由內閣學士遷○調陳孚恩署兵部左侍郎以李嘉端爲倉場侍郎由內閣學士遷○命文慶陳孚恩在軍機大臣上行走○己丑諭吳文鎔奏遵旨覆奏漕務情形一摺據查江西省有漕各州縣歷經奏明將旗丁所得陋規分別裁革飭禁永遠遵行見在旗丁尙無多索自無庸明定費用章程致滋例外影射之弊著卽遵照舊章認真辦

理旗丁則責成糧道嚴行約束不准格外索費地方官則責成司道暨各該知府隨時查察不准格外浮收卽地方偶遇偏災尤當委員確勘加意慎重儻有捏報請緩等弊立即從嚴參辦毋稍寬貸○丙申軍機大臣會同戶工二部議覆給事中張修育奏籌裕庫儲六條一釐定鹽引科則刪減外費清查引目應請敕下各督撫將見徵科則詳查款數銀數應減應裁外支項下酌定用錢款目並飭查各省銷引積存數目設法裁清新引如何疏銷足額籌議具奏一整飭樵務應請嗣後賠繳關稅各員於限內交至七成以上屆期免其革職監追未交之二成餘另作分數予限清完有官者全扣廉俸見在監追各員家屬交至七成以上亦請釋放帶欠之數飭令設法措完一釐正常例將京銜與外銜輕重懸殊者斟酌改定應請將無關選法之從六品光祿寺署正銜起至未入

流翰林院孔目銜止逐加酌定量爲覈減一籌裕銅斤應請此後
運員例帶餘銅槩令交局官爲給價收買一酌定勒追例限查應
追應賠各款本有統限又有分限毋庸變例銀數較重未據結報
家產該員廉俸又復無多者應請由該管上司飭追並查取遲延
職名議處仍將本員廉俸停止一年作抵至候補人員及子孫代
賠並無職官之人責成各旗籍按限著追實係力不能完查明取
結分別辦理一酌辦估變逾限應令各督撫查明入官應變各項
責成見任州縣統行予限一年出示招售如實與原估數目不敷
准照時價變完其因虧那查鈔者應令認真查辦毋許隱匿從之
○以道慶爲內閣學士兼禮部侍郎銜由內閣侍讀學士遷○己亥諭軍機
大臣等前有旨將潘仕成簡放廣東鹽運使因該員籍隸廣東當
經降旨令著英體察情形將有無窒礙難行之處據實具奏茲據

覆奏該員籍隸本省其族姻交好多以鹽務營生究屬窒礙難行
因思潘仕成留於廣東以道員差遣該督可收臂指之助惟本省
道員有無窒礙仍須體察情形據實覆奏如果無窒礙俟覆奏後
當降旨以布政使銜充補道員至於何缺相宜何員堪以道缺擬
升鹽運使均著該督察看奏明請旨毋稍遷就尋奏潘仕成充補
道缺似屬未便可否以候補鹽運使留於粵東差委俟修造船隻
及一切事務大定再請旨作何簡用至鹽運使篆務見派委督糧
道趙長齡署理策疲剔弊不遺餘力惟未敢擅行擬升得旨潘仕
成著以候補鹽運使仍留廣東交耆英差遣委用所遺鹽運使員
缺著趙長齡補授○添設廣東虎門專汛額外外委一○丁未以
何桂清曾國藩俱爲內閣學士兼禮部侍郎銜

何桂清由大常寺卿曾國藩由翰林

院侍講學士遷

○是月緩徵山西解州等二十五州縣旱災額賦並展緩

垣曲縣雹災通賦

六月辛亥定緝譯進士轉補翰林詹章程○丁巳召存興來京以劉喜海爲浙江布政使張集馨爲四川按察使由陝西糧道遷○添建廣東高要縣屬琴沙礮臺並虎門廣濟墟兵卡○戊午耆英等奏英人租地建房等事見經委員覓地妥爲商辦並責成地方文武及紳士等勸諭居民俾各相安○戊辰諭軍機大臣等各直省錢糧出入歲有定額以額相準定爲請留留備留協之分其贏餘銀兩仍於春秋二撥案內悉數撥解部庫以備支用法至善也乃近年留協省分屢有咨請改撥之事部庫待用孔殷每次各省改撥之款皆例應解部之銀非以蠲緩爲詞卽以留支藉口殊不思水旱偏災事所難免各省支款無歲無之何以從前改撥之案尙少近則日多一日前數年軍務河工需用緊急不得不權其輕重量爲改

撥而各該省恃有成案可循幾至年年瀆請若不及早示以限制於京餉大有關係且恐各該省於應徵應解之款易啓那移虧空等弊嗣後著留協省分各督撫於戶部例撥及因案指撥各款務須激發天良認真籌辦不得因向有改撥成案率行援引瀆請並著督飭藩司派委妥員照數按期迅速起解如仍前援案聲請改撥查有不實不盡情弊以及起解遲延卽著戶部據實嚴行參奏以裕經費而符舊章○丁丑諭禮部奏酌議旌表建坊章程等語嗣後各該部隨案請旌之烈婦烈女及年終彙題內之烈婦烈女均著建立專坊以示獎異餘俱著入總坊年終彙題並著各該督撫等於題本內聲明彙建總坊字樣用昭區別○是月緩徵山東臨清等二十八州縣暨德州等四衛河南鄭州等十七州縣被災

東華續錄

道光五十六

臣王先謙敬編

臣周澹蕃恭校

秋七月己卯諭軍機大臣等本日據都察院奏雲南回民丁燦廷等控告香匪串謀滅殺無辜一摺已明降諭旨交林則徐等審辦矣此案控關奸匪挾讎尋釁串謀倡亂被害至一萬餘命之多如果屬實必須徹底根究水落石出庶足以服難民之心而除地方之害林則徐程喬采甫經到任無所用其回護著卽平心研鞫毋枉毋縱務將棍徒會匪嚴行查禁首惡各犯從重懲辦以紓積憤而快人心儻係從前辦理不善不得因案已將就了結顛預塞責遂將萬餘人之屈抑鬱而不伸代人受過已屬不可況數萬生靈之沈冤身爲大吏者竟置之不問耶尋奏丁燦廷等在京控訴係

指二十五年九月初二永昌七哨漢民將城內回民槩行擅殺之事所稱八千餘口之數覈與賀長齡原奏四千餘人之語不符案查賀長齡於二十五六年將該處漢民蕭林貴楊老九等問擬斬梟奏辦在案其辦理不善之道府亦經奏參回民仍以懲辦尙少歸咎於官其實九月初二前後回民兇橫尋鬪各情亦何嘗在情理之中臣等見飭文武彈壓化導將永昌順甯等處絕產逃產悉數清釐漢民回民設法招復責令回漢中紳耆互相約束永禁侵陵至於棍徒首惡嚴密兜擒斷不敢養癰貽患得旨秉公辦理永靖疆圉爲要○乙未諭前據回民丁燦廷等控告香匪萬重劉書等串謀滅殺無辜已交林則徐程喬采親提嚴訊矣此次復據雲南回民杜汶秀控告匪棍劉書等挾嫌藉端誣告從逆致被按殺搶掠追招撫回籍後又被殺害多名等情匪棍擾累無辜大爲

地方之害必應嚴切訊究從重懲辦著仍交林則徐等親提人證
卷宗秉公嚴訊按律定擬具奏將匪徒查禁要犯嚴懲以紓積憤
而快人心原告杜汶秀劉義該部照例解往備質尋奏先後遵旨
查拏匪犯共計四百三十餘名均陸續審明分別凌遲斬絞遣軍
流徒等罪名奏聞在案茲將京控名單與已辦人犯姓名互相核
對已經辦罪者六十六名除凌遲斬梟斬決各犯不便稽誅已於
未審京控之前業經處決外其餘定擬監候及遣軍以下人犯亦
經提到原告丁燦廷木文科杜汶秀劉義等四名逐一質對該原
告均極輸服續獲之黃潰一犯曾爲勒休知州恒文服役膽敢附
和哨匪刃斃人命復將婦女擄藏又縱練丁擄掠應比照謀叛斬
立決律擬斬立決加重梟示審明後卽恭請王命將該犯處斬梟
示至單開各犯屢訊堅供並未燒香爲匪該原告等亦供並未認

識不能指出爲匪確據者自應分別釋回其有實會戕殺回民而該原告轉未控及者亦先後併獲多人俱訊明正法統歸入哨匪案內錄供報部原告丁燦廷等控詞均有失實之處本應照申訴不實律定擬姑念其均已被害情殊可憫應請免其責處至黃潰一犯係勒休知州恒文之家人即使並未縱容亦屬昏憤不職且該員係與已革道員羅天池同辦此案羅天池業經奉旨革職永不敘用該員事同一律僅予勒令休致不足蔽辜相應請旨將勒休知州恒文一併革職得旨恒文著革職永不敘用以示懲儆○癸卯諭鄂順安奏豫省缺雨災民亟應籌款賑恤一摺已飭戶部速議具奏矣因思河南兩次大工之後元氣未復民鮮蓋藏當此苦旱異常小民顛沛情形不忍設想若待該部籌議章程恐緩不濟急即使撥運近省庫款亦覺難救然眉朕焦灼之餘幾廢寢饋

著戶部卽由銀庫先發給十萬兩星夜迅速解交河南暫應急需
並著戶部於該省鄰近省分迅速卽籌撥有著銀二十萬兩飭令該
督撫專派妥員迅速運往以備賑撫之用該撫惟當宣示德意設
法籌畫所有賑撫一切事宜悉心妥議務令災黎得所實惠均霑
該地方官多盡一分之心卽多活一人之命用副朕速沛恩膏惻
瘻在抱至意○甲辰江蘇巡撫陸建瀛代贈禮部尙書銜秦承業
孫宗瀚等奏謝伊祖賜諡追贈恩得旨覽奏景慕落淚書齋風況
猶在目前嗚呼吾師終身繫念不能忘也○是月緩徵陝西乾州
等十五州縣歉收額賦

八月丁未朔諭本年河南省開封等府屬雨澤稀少二麥歉收疊
經加恩撫恤昨又據鄂順安奏到該省亢旱異常報災幾及通省
當卽降旨飭戶部發銀十萬兩並於鄰近省分籌撥銀二十萬兩

星速解往備賑著領解各員無分晝夜迅解該省驗收毋得延誤
干咎因思赤子何辜流離失所轉徙溝壑實覺堪憐但旣已失經
理於先必應善補苴於後雖曰天災流行然人定亦能勝天朕卽
欲特派大臣前往撫輯恐該地方官轉致置身事外儻有掣肘便
覺屯膏當此喫緊之時豈容一隙開推諉之漸况鄂順安身爲大
吏豈不知救荒愛民特恐派委不得其人或不肖官吏從中剋扣
種種弊竇不可不防著該撫督同司道悉心籌畫加意撫綏多方
訪求救荒良法定立章程派委妥員分赴各屬賑濟儻訪有貪劣
委員奸猾胥吏營私中飽立即從嚴懲辦總期荒村僻壤下戶流
民無一夫不霑實惠方爲盡美盡善朕於此事夙夜縈懷無論何
時特派大員前來查訪如有饑民載道或有控告官吏侵吞及有
向隅窮戶未霑恩澤者必將該撫及司道重處其不肖各員加等

治罪言出法隨決不寬貸懷之慎之○己酉諭軍機大臣等吉明奏賊匪滋擾大槩情形並派兵剿捕一摺覽奏均悉本日已降旨將奕山補授葉爾羌參贊大臣矣安集延賊匪出擾盜搶卡倫馬匹並竄入回莊劫掠戕害伯克經該大臣等派兵前往剿捕大有斬擒餘匪見已竄逸出卡該匪等裹脅多人肆行搶掠雖已奔逃四散難保不藏匿各莊希圖糾約復出滋擾著該大臣等嚴飭將弁及守卡官兵等不必出卡窮追接捕務須嚴密防守卡倫實力偵探是否實有和卓密查據實速行具奏毋得稍有含混○庚申命江蘇籌辦糧石賑河南災民並諭鄂順安招商採運○癸亥以溫予巽爲直隸布政使陸元烺爲江西按察使由長蘆鹽運使遷○周祖植以病免調周開麒爲浙江按察使以龔裕爲直隸按察使由清河道遷○甲子諭布彥泰馳奏喀什噶爾回匪滋事見在撥餉調兵籌

勦一摺據稱喀什噶爾卡外安集延布嚕特糾約本地回子屯聚城外尋釁肆擾該督見已咨會提督先行帶兵出關一面督兵親赴肅州照料調度並豫調官兵籌勦等語安集延等回厥性類犬羊反覆靡常膽敢煽結近城回眾困擾城垣藐法已極必應速伸天討以靖逆萌而安邊徼布彥泰著授爲定西將軍軍務一切悉聽節制奕山著作爲參贊大臣襄辦軍務均著頒給關防其所需軍餉卽著由陝西甘肅兩省藩庫分貯項下動用支發該將軍等務宜激勵將弁除暴安良一切相機勦辦迅速肅事俾根株淨絕邊圉肅清以副朕望○河南巡撫鄂順安奏省城見得透雨得旨稍蘇我中州萬姓實深寅感各屬有續報者到時據實奏來○以麟魁爲禮部右侍郎由烏里雅蘇台參贊大臣遷○戊辰諭軍機大臣等琦善等奏據廓爾喀國王之子稟稱揀派噶箕等呈進貢物及該嗣王

襲爵緣由一摺又另片查開廓爾喀王向蒙賞給寶石頂帶成案
覽奏均悉廓爾喀國王子已遵伊父印書襲爵見在揀派噶箕
呈進貢物足見恭順輸忱惟據稱尙有面稟苦楚求祈教導之事
難保別無妄瀆既據該督等頒給檄諭俟該噶箕等到藏時卽當
曉以大義杜其妄念如別無妄求著卽宣示恩旨賞給該嗣王寶
石頂帶令其恪守藩服斷不可別生枝節是爲至要○壬申以雲
麟爲甘肅按察使由安肅道遷○甲戌諭戶部奏積欠案內未完各款
請旨飭催等語各省應追應扣應估變各項均屬帑藏所關不容
稍有虧短前經降旨飭令各省督撫認真嚴催毋再懸宕茲據戶
部查明各省新舊統共未完銀有六百三十餘萬兩之多制錢糧
石積欠亦復不少細查各款欠項皆係有著不解何以舊者延宕
新者踵增陳陳相因伊於胡底當此國用孔亟之時該督撫等全

不以國事爲重因循玩愒積習相沿殊屬不成事體所有戶部單開各項除河南省民欠馬儀工價見值災荒暫緩查辦外其餘各省欠項著各督撫督同司道認真查明已完扣者迅卽報撥未完扣者勒限提催如有屢催罔應及已報徵完而延那不解者立即專摺嚴參各該屬員自顧考成豈敢不急公輸納總緣各該督撫等或礙情面或視爲通行具文討好屬員博取寬大之譽左藏匱乏何以度支著再諭各直省督撫務當破除積習激發天良將逐款陸續嚴催解部年終之時朕將飭部稽查某省自降旨飭催後已完若干未完若干勤惰攸分黜陟所繫毋謂訓誡之不早也○諭前因豫省災荒亟應籌款賑恤曾降旨發給銀三十萬兩因思河南被災甚廣億萬赤子嗷嗷待哺若全待分款撥解仍恐緩不濟急無以速拯災黎著再行先發廣儲司銀二十萬兩造辦處銀

十萬兩星速解交該省以備賑撫之用此外仍著戶部再行籌畫銀三十萬兩就近撥解應用該撫卽嚴飭承辦各員激發天良覈實認真散放務期實惠均霑勿令一夫失所當此經費支絀之時朕不惜內帑以延民命該省紳民殷戶諒念切桑梓必有推解恐後者該撫其善爲拊循勸誘之毋失朕望○諭軍機大臣等本日據薩迎阿等馳奏飛咨援兵起程並各城辦理情形一摺另片奏傳聞逆首係由霍罕逃出滋事等語又據鍾方等奏籌備官兵過境鹽糧車馱等項情形一摺覽奏均悉昨經降旨令奕山督兵迅速進剿並諭布彥泰行抵肅州時察看情形酌量進止見據薩迎阿等查明喀什噶爾存城官兵不下三千餘員名並城內居民甚眾如果調度有方戰守皆資得力奕山計本月下旬總可行抵阿克蘇自己帶同各兵前進著仍遵前旨迅速進兵趁勢痛加剿辦

勿使蔓延毋庸會商布彥泰至布彥泰則須斟酌情形儻賊勢必須併力攻剿自應出關如該回匪僅因逼迫肆掠則不久自散仍以安駐肅州居中策應爲妥所有阿克蘇阿奇木伯克愛瑪特捐備軍需等件著事竣奏明施恩再巴爾楚克爲南四城門戶且與樹窩子相連地方緊要毋令失機此次賊匪內傳述有逆夷張格爾之弟巴布頂之子倭里漢條列和卓在內由霍罕逃出滋事道路之言實難憑信總之金底遊魂無關緊要如能就獲固可立正典刑卽或逃匿此種醜類必遭冥譴斷不可贖武窮兵以必得首逆爲快免得許多影射貪功之念總期迅速肅事早撤糧臺爲要至鍾方等奏籌備官兵供支豫爲妥辦諒早咨會應否調遣不爲遙制悉聽隨時酌辦飛咨辦理○丙子諭軍機大臣等本日據吉明等奏英吉沙爾城垣被賊圍困派往救援官兵中途遇賊得獲

勝仗派兵接應並動項支發官兵鹽菜口糧請撥銀接濟各一摺
覽奏均悉據稱七月二十七日有賊匪二三千人圍城放火經我
兵開礮擊退旋經帶兵遊擊花沙布等殺斃賊匪不計其數賊兵
敗後復聚眾圍城請調兵接應等語此次賊匪圍困英吉沙爾雖
人數眾多俱係裹脅烏合之眾其賊首名目無非聳人聽聞藉此
易煽良回安可盡信見在伊犁等處官兵計已陸續到齊奕山正
可乘此銳氣一鼓殲滅務令片甲不回方足以儆將來而靖邊圉
奕山係棄瑕錄用之人此次如能殫竭血誠早告成功不僅稍贖
前愆尙可恩施格外正是奕山立功之秋朕惟知賞功罰過其各
懍遵至關外之兵儘數調遣布彥泰著仍遵前旨暫駐肅州居中
調度無須妄動所有備調之兵可止則止各路糧臺可撤則撤吉
明等請於陝甘撥銀十萬兩解赴葉爾羌以資接濟此次軍需均

已陸續撥去著咨商布彥泰知照署陝甘總督酌覈應發應止隨時樽節動用至另片奏賊匪滋擾巴爾楚克情形雖據奏稱經兵勇將賊匪擊散難保不復來窺伺著督飭該城糧員遊擊等竭力防堵萆爾之地尙保無恙何以喀城退敗株守調度乖方於茲益信奕山等應鑒覆車而勉力圖報也○是月賑陝西西甯縣水災緩徵山東樂安等六縣被水額賦並水利等四場竈課

九月丁丑朔日有食之○戊寅諭漕糧爲天庾正供節經降旨令有漕各省督撫嚴飭所屬早兌早開剋期渡黃毋稍遲延乃近年重運漕船不能如期抵壩抵通以致歸次受兌節節耽延總緣各該督撫不肯破除情面先期派員寬濫臨時實力催趲所致卽如本年三月漕船甫經開行陸建瀛參奏逗留之文武員弁劉琅邱詠思潘佐庭劉椿齡等及至八月楊殿邦又奏借山東撥船協運

種種竭蹶情形幾以不誤重運爲僥倖之事毫無把握可知見在
節逾寒露水勢漸消著漕運總督及沿途各督撫分飭所屬嚴行
催趲務使各省回空軍船連檣南下銜尾遄行不准片刻停泊庶
幾以速補遲如期歸次至來年新漕轉瞬屆臨尤當趕緊辦理按
限兌開統限於四月初十日以前全數趲至清江剋期抵壩以便
渡黃北上毋許稍有延誤儻意存怠玩視爲具文各口淺阻之處
並不先事挑挖仍致臨時周章有逾例限定將該漕督及各該督
撫嚴行懲處決不寬貸○命文慶張澧中往河南查賑○辛巳諭
本日吉明舒興阿由六百里馳奏續派接應官兵協同前派官兵
中途遇賊合力攻擊大獲勝仗一招覽奏忻悅葉爾羌前次派往
救援官兵中途遇賊已有斬擒因賊勢太重續派官兵馳往接應
該大臣等恐軍行遲緩卽派署把總馬連科執持令箭沿途催趲

前派帶兵遊擊花沙布等折回黑孜布依地方安營隨有賊眾追來四面圍繞並於附近營盤高阜壘築礮臺以回房多閒藏避槍礮該遊擊雙來親冒矢石率領官兵奮力向前將礮臺回房全行拆毀接連五晝夜極力抵禦隨聞援兵繼至卽率官兵出營堵截防禦愛陳布守備平喜亦卽驅兵近前兩隊合一奮力追擊賊匪被傷落馬者不計其數餘眾散見在大兵尙未到齊喀城雖無確信然發軔之始卽能令回眾膽寒深堪嘉尙必應加恩獎擢遊擊雙來著以參將卽行升用賞戴花翎並賞給法福哩巴圖魯名號防禦愛陳布著以該旗佐領升用遇缺卽補守備平喜著以都司升用遇缺卽補均著賞帶花翎署把總馬連科著以千總卽補並賞帶藍翎吉明舒與阿調度有方甚合機宜均著賞帶花翎仍交部從優議敘並發去花翎五支著吉明等祇領所有奮勉之兩

次派出官兵伯克等著查明開單具奏候朕施恩其陣亡帶傷兵丁著查明咨部照例辦理○諭軍機大臣等前因回疆賊匪滋事關外之兵足敷防剿會疊經降旨停調關內官兵令奕山督兵進剿布彥泰暫駐肅州策應本日據布彥泰奏接奉授爲定西將軍諭旨刻卽起程請飭籌撥銀兩各一摺又據吉明等奏續派接應官兵協同前次官兵合力擊賊大獲勝仗賊眾奔竄及覓移兵駐紮要隘一摺又據扎拉芬奏片奏截留伊犁滿洲三營官兵赴葉爾羌應援及辦理軍需支應各等語已明降諭旨將吉明等優加賞敘並令布彥泰駐紮肅州策應督率司道辦理糧臺楊以增仍回陝西巡撫本任矣關外救援官兵疊獲勝仗大兵一到自可立予殲除布彥泰旣不出關則奕山專司進剿儻有須接應之處並著吉明後路應援以壯聲勢仍會同商辦進剿之方毋失機會布

彥泰著仍遵前旨居中策應俟楊以增將總督關防交還時所有定西將軍印除已行文鈐用外著暫行封貯勿用仍用陝甘總督關防辦理一切其所帶官兵一千名與台湧見帶官兵一千五百名著酌量情形可止則止其選派涼州肅州各營兵卽著停止前進至土爾扈特兵丁據布彥泰奏向爲回眾所畏亦著突山察看情形分別進止賊眾煽惑回民妄稱逆裔無論有無皆不可信突山務當堅持定力徧諭軍民爲要所需軍餉已由戶部籌撥銀百萬兩著撙節動用毋令稍滋糜費關內糧臺原爲轉輸關外軍餉馱載而設但目下情形豈能做照六年十年光景動云數百萬兩著仍遵前旨加意籌畫可撤則撤以節虛糜吉明等奏紮營之處向有水塘足供千人汲飲被賊堵塞來源夜閒水復暗長此皆我將士忠義之氣所感著該大臣等於事竣後酌量如何仰酬神貺

妥議具奏○布彥泰奏出征官兵請支用車輛以利進行得旨著
不准行○甲申諭直隸山東河南官吏會拏捻匪○以捐助河南
賑務予刑部侍郎周祖培等議敘有差○癸巳諭軍機大臣等本
日據鍾翔等奏卡外布嚕特比愛吉伯克遣人呈獻逆信一摺據
稱見因喀英二城被賊圍困業經揀派章京譯寫飭諭傳知卡外
附近各伯克使知從逆難免殲戮務各保全身家勿被煽惑旋據
奇里克愛曼布嚕特比愛吉伯克差人呈遞逆夷倭里漢條列所
寄密信令其糾結攻城等語又據胡什奇愛曼布嚕特比木薩拜
遣人稟稱倭里漢條列差人糾約情詞相同該布嚕特比等世受
深恩未肯從賊尙知嚮風效順業經該大臣等賞給段匹茶葉等
物微示獎勵是所傳密信雖未足據而該伯克不甘從逆確有可
徵自應加等施恩爲各城伯克之勸著奕山沿途體察廣爲宣示

不必遽以各處所傳書信爲真而伯克等不爲所搖惑者將來必邀重賞所有此次恭順之愛吉伯克木薩拜應如何從優恩獎之處卽行據實奏聞○乙未諭軍機大臣等本日吉明舒興阿由六百里馳奏喀什噶爾英吉沙爾兩城平穩情形一摺又另片奏官兵兩次轟擊賊匪疊獲勝仗等語據稱前次大獲勝仗之後茲於八月初一初二等日賊匪在英吉沙爾城南築立礮臺晝夜望城攻打經領隊大臣德齡派令中城兩營守備楊成義與貴帶領精兵奮勇出城勦賊我兵施放槍礮擊斃賊匪多名乘勢將其礮臺拆毀復殺賊數名奪獲器械並有賊匪經我活捉者連前次拏獲從逆之回子一併正法梟示又初六初七初八等日該匪等仍將礮臺築起我兵拆毀擊殺如前獲械斃賊較前十倍賊眾始行潰散該大臣德齡兩次派兵出城俱獲勝仗於大兵未到之前卽已

大振軍威俾賊膽落實屬調度有方該守備楊成義與貴所帶兵勇不過數百名卽能衝鋒禦敵所向無前尤屬驍勇可嘉之至德齡著賞帶花翎並交部從優議敘楊成義與貴均著以都司卽行補用並賞帶花翎以示嘉獎發去花翎三支著德齡等祇領兩次出力官兵勇著查明開單具奏陣亡兵丁三名帶傷兵勇二十餘名均著查明咨部照例辦理○以山東麥收歉薄命各屬改徵粟米○丁酉諭兩江總督向來有兼轄河務之責自道光二十二年起因他務未能兼顧嗣後仍著該督兼管以符舊制○戊戌諭軍機大臣等本日先據奕山奏賊勢日加緊急擬卽進兵並分咨各處策應續據布彥泰奏催令台湧帶兵迅速前進又據吉明舒興阿奏賊匪滋擾軍臺經換防官兵擊散臺路復通又據鍾翔興資奏偵探賊匪情形各一招覽奏均悉此次賊匪連次圍困喀英

二城又將喀什噶爾回城攻破嗣後擾斷臺路傷我官弁兵丁將賴里克二臺臺門燒毀並將外委賈國相劫去經新派換防之涼州營守備馬興魁千總蔡耀宗督率兵丁奮力攻擊殲賊多名詎賊匪暗中放槍致馬興魁蔡耀宗同時陣亡兵丁亦有損傷見在葉爾羌東路臺站文報雖已照舊往來而喀什英二城被困日久亟應厚集兵力及早救援卽葉爾羌巴爾楚克亦須先事防堵奕山見已帶兵先進台湧統帶甘州涼州肅州三處官兵三千餘員名亦經布彥泰催令全數出關以爲奕山後路策應兵力無虞單薄奕山等正可乘機迅勦毋稍遲回仍一面商同吉明舒興阿趕緊分兵應援喀什英二城俾免疏虞惟賊情狡黠一聞大兵追捕難保不先行奔竄奕山等務當審度機宜出奇制勝應如何牽綴賊勢暗派得力將弁帶兵繞出賊匪之前截其歸路自無難首尾夾擊

俾逆賊片甲不還或揚言大路進兵而暗從捷徑兼程超越聲東擊西使該逆腹背受敵亦可取勝賊首條列和卓據鍾翔等稱探得右手背有黑記一塊較易辨認尤不難暗諭兵勇著服兜擊以除逆種所有鍾翔等差往偵探之布魯特頭目密爾雜胡里等並此次在賴里克二臺擊賊出力之涼州營弁兵均著奕山等會同鍾翔興貴查明保奏候朕施恩陣亡守備馬興魁千總蔡耀宗均著咨明該部議卹傷亡兵丁一併查明咨部照例辦理奕山接奉此旨時如賊匪業經擊散可無須再行接應卽酌量情形分別應止應撤事宜不可輕率儻後路兵單慮無接應則台湧見帶兵勇三千餘名布置得宜首尾相顧儘敷攻擊佇望成功總之用兵於萬里之外朕固不能懸揣亦不肯遙制全在奕山等胸有成竹欲進兵時先籌全局若僅以驅逐爲事則該回正當飽颺之時大兵

一到四面紛竄未經痛剿難保不窺伺再來以有限之軍需供無
休之蹂躪成何國體必應將騎馬兇惡之逆匪數百名盡法懲辦
俾巨憝膽寒永靖邊徼其餘裹脅回眾趁此離心離德之際大加
安撫方爲王者之師若統兵萬餘直抵喀城兇惡者已逃懦弱者
被戮豈朕除莠安良之意耶嗣後凡有關軍務要件該大臣等均
應由五六百里馳奏備大軍奏捷賊眾悉就剿除或將逆首陣斃
或被生擒著卽由八百里奏報以慰廑念至薩迎阿請以舒興阿
署伊犁參贊大臣等語著俟軍務竣後再行奏聞咨會分別赴任
以專責成○乙巳諭軍機大臣等本日據薩迎阿奏請籌撥軍餉
一摺並片奏派委大員馳赴巴爾楚克統領官兵等語又據吉明
舒興阿奏賊匪潛擾東路三四兩軍臺派兵往剿賊已竄逸一摺
覽奏均悉此次賊匪先因滋擾賴里克二臺當被官兵擊散茲復

由樹窩子潛出擾掠邁那特三臺並阿朗格爾四臺燒毀房屋殺斃臺兵搶去馬匹旋即竄去計此時奕山自阿蘇統兵前進成玉所帶官兵當亦到齊與奕山會同進剿軍威大振不難淨埽妖氛惟所稱該匪等甫經擊散旋出滋擾一日之間連燒兩處軍臺又稱有馬隊賊匪究竟該處止係匪徒乘閒竊發抑竟係喀城賊黨長驅而來見在該匪等又馳赴何處著奕山等查探明確遇便具奏其伊犁派出喀什噶爾換防滿洲三營官兵卽著催令趕緊抵防以資援應惟路隔萬餘里調兵四路紛紛諭旨到時已非遙揣所能定計該參贊等務當恪遵本月二十五日所寄諭旨統籌全局盡力攻擊兜剿成擒毋令軍餉空糜止成尾追驅逐之局將來兵撤再有滋擾豈不憤懣耶薩迎阿所奏札委換防回任之陝安鎮總兵豐伸馳赴巴爾楚克統領各官兵遣勇嚴密防堵著奕山

等酌量情形何處空虛卽調駐何處接應不可株守誤事所請於山西陝西兩省藩庫內趕緊籌撥銀兩解赴阿克蘇之處前已由部飛催起解茲又諭知各該撫遵照辦理並由戶部再籌款豫撥聽用但羅掘之餘實形支絀急盼捷音該將軍等務當將日後情形豫爲計議及事至而始圖之恐糜費已不少矣勉之○是月給河南禹州等四十一州縣旱災口糧蠲緩直隸安州等三十六州縣水旱災雹災新舊額賦

冬十月戊申諭御史張寶璿奏州縣吏役縱匪殃民請飭查懲辦一招州縣爲親民之官遇有匪徒擾害地方自宜嚴拏懲辦以安良善乃如該御史所奏各省有會匪捻匪掖匪名目聚集橫行魚肉良懦及事發控告又爲吏役蒙蔽槩置不問縱匪殃民莫此爲甚各省督撫受恩深重一切安民察吏應如何認真講求乃於各

該州縣縱盜害民置若罔聞總以塗飾將就爲事是受屬員之欺而卽以欺上身爲大吏置國計民生於不問天良安在耶嗣後各直省督撫務當嚴飭各該州縣偵緝匪徒漸絕根株並嚴定章程如該州縣有衙蠹包庇惡匪被民人指名控告一面申報一面拏辦免其察議儻隱匿不報別經發覺卽將該州縣從重參處再遇有民人上控匪徒擾害情節重大者若仍批回原審之員則小民受虐愈酷該督撫酌量親提派員嚴審訊有吏役庇護蒙蔽情事卽將吏役等加等治罪並將該地方官嚴行參處該督撫等務當破除情面以除莠安良爲心毋得藉口積重難返畏難苟安使吏治民風蒸蒸日上朕所望也經此次訓諭之後儻仍泄沓從事不能興利除害覲顏坐鎮封疆縱倖免朕之譴責其將何以對此小民乎○己酉諭京師及各省編查保甲○辛亥賜李信等六十八

人武進士及第出身有差○戊午諭軍機大臣等寄諭欽差戶部左侍郎柏葰等有人奏山東玩縱盜賊情形一摺據稱山東各州縣盜賊搶劫之案層見疊出該州縣諱匿縱容動輒賠銀了事甚至督同拏賊之官親兵役被賊槍傷斃命不敢直報總由大吏彌縫粉飾惡聞報盜所致巡撫崇恩統轄全省何至毫無見聞其平日之不知振作已可槩見所稱臬司徐思莊示諭居民有巨盜進莊勿許驟攖其鋒止許跟蹤尾捕俟其氣餒力困然後兜拏等語是其不能設法督緝措置乖方莫此爲甚著該侍郎等按照原奏各情節逐一訪查明確據實參辦毋得稍存瞻顧徇隱之見致有不實不盡是爲至要○己未准江蘇蘇州等三府州明年漕白糧米改由海運○辛酉諭軍機大臣等陸費瑔奏訪拏糾黨結會匪犯情形一摺湖南新甯縣屬與廣西全州交界之黃坡崗地方有

猺人雷再浩民人李輝陳名機糾黨結會希圖搶掠並有居住全州五排梅溪口等處之猺人蕭立山等糾人入夥情事迫經兵役捕拏並地方紳民帶領壯丁隨往幫捕復敢逞兇抗拒傷斃鄉民實屬罪大惡極若不上緊緝拏全獲必致日久蔓延該撫見已飛飭文武員弁選帶兵役馳往督拏並於新甯縣接壤各處就近派兵堵緝卽著嚴飭認真兜拏毋稍疏漏並著廣西巡撫鄭祖琛嚴飭全州文武員弁一體實力防堵務將蕭立山等上緊嚴拏並各逸犯案名全數弋獲盡法懲辦不准一名漏網該撫等務當嚴飭所屬不分畛域合力接捕立盡根株○乙丑 上閱健銳營兵○諭劉韻珂奏履勘臺灣水沙連六社番地體察各社番情據實覆奏一摺當交大學士軍機大臣會同該部悉心計議茲據穆彰阿等公同酌覈以該生番輸誠獻地固由不諳耕種謀食維艱欲求

內附以爲自全之策惟利之所在日久弊生生番合壤而居不能
不與漢民交易日後官吏控馭偶或失宜卽易激生事端國家開
闢邊境計畫必周與其輕議更張而貽患於後不若遵例封禁而
遇利於先所議自係籌及久遠未肯遷就目前且此項番地舊以
土牛爲界乾隆年間復立石碑例禁禁嚴自應恪遵舊章永昭法
守該督所請六社番地歸官開墾之處著毋庸議○丁卯諭前據
御史王東槐奏山東地方官玩縱盜賊措置乖方各情形當交柏
葑嚴密訪查茲據柏葑等奏稱訪查該臬司刊刻告示一本與該
御史所奏相同並將編查保甲司道聯銜札示一併呈覽保甲之
法原爲弭盜良規乃平日既不能實力奉行及至盜匪充斥僅託
空言全無實效巡撫有統轄全省之責司道等亦職在察吏安民
於該省緝捕重務先事不思豫防臨事復不能妥速籌辦以致延

及鄰省所司何事實屬咎有應得崇恩王篤徐經王懿德英桂岳齡均著先行交部嚴加議處至臬司徐思莊告示居民則稱巨盜進莊止許鳴鑼集眾勿許驟搜其鋒賊去始令追捕並有以縱爲擒以予爲取之語其意何居實屬荒謬不通之至徐思莊著卽行革職御史王東槐陳奏得實著遇有給事中缺出卽行升補仍交部議敘○諭軍機大臣等柏葑等奏查辦事件先行奏聞一摺覽奏均悉據奏中途查訪賊匪巢穴詢得山東曹州府與直隸開州東明縣接壤地方實有計謀山俗稱鷄鳴山距開州東明約三百餘里前年有匪徒占踞將寺僧殺斃自立名號四出劫掠見雖有因拏逃竄之說未必確實著崇恩派委文武員弁迅卽前往該處嚴密查拏此地界連三省並著訥爾經額鄂順安嚴飭所屬於該省交界地方協力堵截欲清匪迹必須先搗巢穴若僅委之差役

緝捕虛應故事儻該匪等稍有恣橫反費周章著該督撫等遴派妥實員弁酌帶兵丁密偵按捕分投兜緝務令悉數就擒毋任一名漏網以靖奸宄而安良善○調劉源灝爲山東按察使以明誼爲山西按察使

曲甘肅鎮

○戊辰諭本日奕山由五百里馳奏路

遇賊匪連獲勝仗一摺葉爾羌所屬科科熱依瓦特地方有賊匪數萬在該處屯紮該參贊督領官兵趕緊前進正行走間馬步賊匪數萬蜂擁前來槍礮並發勢甚兇猛該參贊將馬步隊分爲三路中路提督成玉率領步隊施放連環擡礮賊匪不能前進分左右來衝復經左翼領隊錫喇布等右翼領隊忠泰毓書等率領馬隊擡礮槍箭並發賊匪披靡敗走我兵向前追趕賊匪左右伏兵來衝復分兵迎擊賊匪力不能支隨即竄逸追至科科熱依瓦特地方賊匪復整隊來迎我兵奮勇向擊自午至申賊匪槍礮不繼

又復潰散先後生擒賊匪八十餘人傷斃不計其數獲槍礮刀矛
旗纛駝馬帳房無數並獲大礮一尊該匪蟻聚數萬餘人經該參
贊等督率兵勇奮力前擊一日三戰以少勝多奮勇可嘉朕心欣
慰之至奕山著賞給二等鎮國將軍賞戴雙眼花翎並賞給喜字
玉搬指一箇白玉翎管一箇仍交部從優議敘提督成玉著賞戴
雙眼花翎並賞給烏勒興額巴圖魯名號領隊錫喇布著賞給呼
爾敦巴圖魯名號忠泰著賞給齊琛巴圖魯名號領隊毓書著賞
給頭等侍衛均著交部從優議敘協領西喇那吉魯木齊固呢杭
阿並在事尤爲出力員弁著該參贊查明保奏候朕施恩至署阿
克蘇辦事大臣扎拉芬泰辦理糧臺源源滾運應需軍火口糧一
切無誤亦著加恩賞戴花翎仍交部從優議敘○庚午諭奕山奏
大兵復獲勝仗賊匪分竄英吉沙爾城垣解圍一摺英吉沙爾城

垣久被賊匪圍繞文報不通經奕山於科科熱依瓦特地方連獲勝仗後督率官兵長驅直進馳至距英吉沙爾三十餘里地方忽有賊匪數千人自山後突出該參贊飭令提督成玉率領官兵一同向擊槍礮齊施該賊匪被擊傷斃不計其數餘匪逃竄復經領隊錫喇布等帶領馬隊追趕直至英吉沙爾城西山梁賊匪向西竄逸官兵進城該參贊等乘勝長驅重圍立解殊爲可喜奕山著加恩賞給喜字白玉搬指一箇喜字白玉翎管一箇黃辦珊瑚豆大荷包一對小荷包二箇並交部從優議敘奕山之子三等侍衛載鸞著加恩賞挑乾清門提督成玉領隊西喇布忠泰筆書均著加恩各賞給白玉搬指一箇白玉翎管一箇俱交部從優議敘忠泰並著加恩賞挑乾清門各協領並在事尤爲出力員弁著奕山查明保奏候朕施恩○壬申諭廉敬等奏乍了大小喇嘛震懾天

威退還侵占地方情願當差出具永不翻悔甘結地方平靜驛路
通衢並分別革職治罪結案一摺此案乍了大小喇嘛挾嫌殘殺
爭控不休甚至阻滯官兵梗塞道路經廉敬琦善等遵旨專派番
目等前往該處按照敕書經典嚴行查訊該大小喇嘛等咸知省
悟情願痛改前非出具甘結當將占據地方退還各頭目分別定
罪俾各恭順當差不至仍前抗違所辦妥協可嘉之至所有前次
派令查辦此案之四川委員宣瑛姚瑩於投遞稟輒用漢文札
飭以致得所藉口辦理本屬疏略均著交部議處此後各該呼圖
克圖遇有事件徑稟駐藏大臣覈辦不准文武員弁干預卽呼圖
克圖出缺亦毋庸另委代辦其頭目止准擇人不得互相襲充以
息爭訟而杜夤緣餘著照所擬辦理○癸酉諭本日據奕山馳奏
喀什噶爾賊匪分竄城垣解圍並收復回城一摺該參贊於兩次

擊散賊匪後督兵由英吉沙爾前進未到喀什噶爾卽探知該賊
匪先已聞風竄逸盡數逃散出卡官兵整旅入城見在搜查回莊
餘匪等語此次回匪入卡滋事本係烏合之眾喀什噶爾雖被圍
困並未偏近城垣經奕山等督兵赴援兩次擊散賊匪卡內肅清
勦辦尙爲迅速奕山等屢經降旨加恩所有先後出力各員并著
查明據實保奏至喀什噶爾城本堅固當賊匪入卡滋事時該城
大臣開明阿等坐擁重兵先事旣失防範臨時又復退衄所統滿
洲綠營官兵臨陣推諉致誤事機及至城垣被圍存城官兵尙有
三千餘名之多未能遣兵出城衝擊坐守待援一籌莫展庸懦無
能實屬可恨開明阿豐伸泰著卽解任由奕山派委妥員解交布
彥泰嚴審確情定擬具奏喀什噶爾辦事領隊大臣著毓書暫署
換防總兵著錫喇布暫署一切善後事宜並著奕山會同吉明舒

與阿毓書等酌量妥辦奕山著俟事竣再回葉爾羌參贊大臣本任○是月蠲緩安徽泗州等三十九州縣水旱災新舊額賦緩徵湖南澧州等五州縣江西進賢等二十一縣山東濟甯等五十九州縣衛湖北沔陽等二十七州縣陝西葭州等四州縣被災新舊額賦三姓水災額賦通穀

十一月戊寅召王駕來京以徐澤醇爲山東布政使調程煥采爲湖南按察使以常大清爲湖北按察使

服闋安徽按察使

○己卯諭軍機

大臣等本日據崇恩奏查明曹州府屬與直隸接壤各州縣境內並無計謀山卽鷄鳴山之名惟天下郡國利病書載直隸開州境內有雞鳴山但別無計謀之名又查濮州境內有金寶山曾有匪徒聚眾劫掠是否卽係此山見已派委文武員弁馳赴該處確切偵訪等語雞鳴山在直隸山東交界之處前此既有匪徒占踞四

出劫掠卽不論其山在何處境內但有匪徒蹤迹應不分畛域協力查拏著訥爾經額仍遵前旨嚴飭派委各員會同山東委員迅往掩捕嚴密搜查務期搗其巢穴盡法懲辦毋得稍留餘孽致滋後患○庚辰諭軍機大臣等見在大兵克捷二城解圍賊匪業已遁竄自無須出卡窮追惟前據吉明等奏稱訊據安集延回子熱孜克供稱此次賊首係阿里瑪斯玉素普和卓之子布孜爾罕愛林伯克巴布頂和卓之子倭里罕條列加瑪爾密喇普張格爾和卓之子罕和卓斯底爾罕等勾結滋事並據該參贊大臣查奏名目略同惟該匪等詭詐多端託名煽惑希圖糾結是其慣技所稱和卓等名號是否實有其人抑係將年歲相等之人冒名假託哄誘回眾入卡滋擾未便因探信回子等傳訛之詞遽信爲真卽鍾翔等前奏差往偵探之密爾雜胡里所稟因送馬面見玉素普之

子條列和卓右手背有黑記一塊等語亦難保非捏詞飾混試思該匪等蹤迹斷難逃人耳目所有附近邊卡之回子居民及各官弁伯克中必有能知其詳者著奕山等遴派員弁伯克設法密訪加意詳查務得實在情形據實具奏尋奏探訪此次滋事賊首係張格爾之兄玉素普兩子連買的明阿布都拉張格爾之弟巴布頂之子倭里罕條列由霍罕進卡滋事實未聞有布孜爾罕罕和卓斯底爾罕等名目至條列和卓卽係倭里詳加查訪並無人知該逆手有黑記報聞○辛巳諭軍機大臣等本日戶部遵議李星沅奏淮南鹽務見辦章程一摺已依議行矣又片奏楚岸滯銷情形等語據稱楚岸鹽價前因積滯過多先後酌減見在存鹽積引幾及三綱之數銀價日昂鹽價益形喫重若不亟加整頓於國課關繫匪輕著李星沅裕泰率同該運司鹽道確查漢岸見時鹽價

每斤究係合錢若干並見在存鹽因何遞年積壓一至於此究應如何設法補救之處熟籌妥議迅速奏辦至淮南行銷之江西安徽湖南湖北各口岸巡緝尤關緊要著該督等分咨該撫嚴飭地方文武不分畛域實力巡查總期實心經理俾離務日有起色該督撫受恩深重具有天良當此國用支絀之時再不力圖振作年復一年伊於胡底該地方員弁尤當各顧考成認真辦理不得視為具文仍前玩泄也尋奏見在漢岸價值每鹽一包售銀二錢三四分每斤合錢五六十文較例價二錢五分九釐所減已多而銷數仍未加暢是減有本之岸價不敵無本之私鹽惟有嚴切緝私為目前要務臣裕泰委員分赴邊界查拏窩囤並於鹽船經過之武穴及泊船之塘角地方設卡巡防至場壩透私亦經臣李星沅先後委員扼要堵巡能少一分私鹽即多一分官引下部議以該

督等合力緝私因地布置於疏引裕課之源已得網領應責成實
心經畫毋稍鬆勁從之○以明玉爲庫倫辦事大臣奕毓爲理藩
院右侍郎軸內閣○癸未諭軍機大臣等本日據鄭祖琛等奏剿
辦會匪連獲勝仗仍兜捕合剿一摺會匪雷再浩李世得等分投
竄擾全州咸水口等處地方經鄭祖琛等督飭官兵疊次攻擊連
獲勝仗先後擒斃匪犯三百餘名並將最要犯李世得槍傷斃命
其家屬一併擒獲雷再浩勢已窮蹙率領賊眾逃匿山內該撫等
見已嚴飭官兵奮力進剿著卽督飭該官兵等會合剿捕設法擒
渠務使賊首就獲餘匪搜除淨盡毋留遺孽以絕根株槍斃李世
得之兵勇著查明具奏其陣亡弁兵照例咨部議卹○甲申諭前
因喀什噶爾回匪滋事開明阿等臨時退避坐失事機曾經降旨
將開明阿豐伸泰解任交布彥泰嚴訊確切具奏茲據開明阿等

奏守城始末及援兵解圍情形一摺開明阿等坐擁重兵一籌莫展迨經回城回子報稱賊匪逃竄情形不知乘機邀擊尙復遲疑株守又經奕山諭令出兵夾擊仍復畏縮不前乃猶覩然飾詞具奏可恨之至開明阿豐伸泰著卽行革職交奕山立卽鎖解交布彥泰審訊如接奉此旨後開明阿等業已起程卽著布彥泰迅速派員迎提卽行傳旨鎖解到時著布彥泰嚴行訊究毋任狡展務得確情定擬具奏○諭吉明等奏官兵搜捕餘匪回莊肅清一摺前經該大臣等派令官兵前往奎里鐵列木莊搜捕餘匪行至沙梁附近遇見馬步賊匪官兵迎擊該匪等膽敢抗拒我兵槍礮齊施賊被轟擊敗退把總朱德首先殺賊該將弁等奮勇驅兵直撲賊巢擒斃多名餘匪竄散附近地方均經逐細搜剿餘黨悉就肅清該莊均係情蘭回戶前此屢經附逆此次官兵往捕仍敢

抗拒實屬怙惡不悛見既悉數殲除庶足稍示懲儆所有首先殺賊之把總朱德著以守備升用先換頂帶其在事尤爲出力之官兵伯克等著查明具奏○壬辰諭前據御史陳壇王東槐毛鴻賓參奏山東省盜賊公行捕務廢弛各款當交柏葰陳孚恩前往嚴密查辦前據奏稱明查暗訪統計查出搶劫之案與原參相符者共計十六件另有九案查無確據仍請飭查等語山東省本年夏秋以來劫案之多爲向來所未有該省大吏察吏安良是其專責如此捕務廢弛實難辭咎崇恩孤恩溺職著來京候旨所有該省失事地方之曹州兗州兩鎮總兵及該管各道員並知府等官俱著新任巡撫張澧中於到任後按照劫案多寡詳細查明分晰據實參奏其搶劫各案卽著張澧中嚴飭迅速緝捕賊賊務獲仍查明未經究出各案該州縣等有無諱飾情弊以昭嚴實○以張澧

中爲山東巡撫陳孚恩爲刑部右侍郎

署兵部右侍郎

○甲午諭軍機大

臣等裕泰等奏盤獲西洋人潛入內地傳教一摺據稱西洋人李若瑟羅沅勒改換服飾潛至湖北省與民人馬五芝等會遇勸允傳教並有該省上年委員解粵領管之納巴羅一名復行來楚欲圖傳教等語該國習教念經例不准赴內地傳習以防蔓延滋弊茲西洋人李若瑟等曾至山西陝西等省復先後至湖北傳教既經該督撫解回廣東著著英照例妥辦○乙未諭前據陸費瑯奏湖南新甯縣與廣西全州交界地方搖匪糾黨焚搶抗拒官兵飭委文武員弁督拏堵剿復經鄭祖琛等奏派官兵疊次攻擊擒獲匪犯多名並將廣西結會滋事首犯李世得槍斃惟新甯首匪雷再浩與民人李輝等竄匿深山負隅自固尙稽弋獲本日據陸費瑯奏將首要各匪生擒提省審辦地方肅清一摺所辦甚好此案

新甯縣徭匪與民人勾結肆擾蔓延廣西經該撫等先後調兵勦辦協力殲擒該匪等仍敢竄回新甯恃眾焚掠勢愈猖獗經該縣營馳往捕拏擒獲多犯復經該鎮道督同委員設計偪令出巢離險分路攻擊該匪等猶敢衝突抗拒官兵槍礮愈猛勇氣倍加立將首惡甯再浩生擒並著名要犯李輝一名拏獲餘黨悉就殲戮地面肅清該地方文武生致渠魁埽除餘孽陸費瓊調度有方著加恩賞戴花翎所有首先拏獲首逆之員及始終在事協同防勦出力各員弁著該撫確切查明分別保奏候朕施恩○庚子諭軍機大臣等前據鄭祖琛等奏官兵攻擊匪徒槍斃首犯李世得旋據陸費瓊奏官兵生擒首犯雷再浩等疊經降旨飭令會合進勦並嚴搜餘匪矣茲據鄭祖琛等奏稱疊次勦捕匪徒殲擒多名賊勢奔退仍飭會勦一摺另片奏訪獲逆子及見在辦理情形各等

語楚粵交界地方匪徒滋事在粵省較爲猖獗首犯李世得被殲後該匪徒仍復奔匿負隅抗拒該省官兵等兩次奮力攻擊大有斬擒賊勢窮蹙竄匿該撫等仍督飭官兵會同楚省兵弁合力進剿見在首逆雷再浩已在湖南地方就獲恐該省餘匪尙多聚散無定深巖絕峒或多伏藏意圖乘機出擾著卽嚴飭兵弁實力兜拏分途搜捕務期掃除淨盡勿留餘孽至該處人民雜居難保無游手不逞之徒聞風嘯聚該撫已諄飭各屬舉行團練曉諭民人各安生業不得聽從煽誘著卽督飭實力辦理儻查有糾結匪徒妄思蠢動立即嚴拏究辦以遏其萌再該撫風聞湖南道州地方亦有匪徒聚集意圖焚搶情事該省灌陽縣屬毗連自應嚴密防範見已咨會提督派兵前往堵禦著卽令該將弁等加意防守毋任稍有竄越所有見在兩次擊賊及拏獲逆子李加輝出力人員

著查明據實保奏候朕施恩再此等事件應由驛馳奏○壬寅春英等奏黃竹岐民人與洋人互毆致斃洋人六命德庇時坐駕兵船來省遞到覆文懇將兇犯拏獲卽行正法民人亦被洋人毆斃二名見在查辦命嚴緝正兇持平審辦○是月給山西絳州等十一州縣應口糧蠲緩直隸安州等三州縣山西絳州等十一州縣河南禹州等六十四州縣被災新舊正雜額賦緩徵江蘇高郵等五十一州縣衛山東荷澤等七縣衛甘肅河州等二十三州縣被災新舊正雜額賦展緩陝西華州等十五州縣逋賦

十二月壬子諭鄭祖琛等奏殲捕滋事匪徒並見派弁兵馳往堵禦一摺廣西灌陽縣屬前有湖南道州匪徒竄入搶掠經該縣會同該處團練鄉勇協力圍拏疊次格殺多人並拏獲匪目左廣秀等二名該匪等俱已潰散逃回道州及交界之永明等處見在匪

犯李魔旺已在湖南被獲尙恐餘匪出沒無常難保不復行竄擾該撫等業已派委員弁馳往該處著卽飭令該員弁等於交界處所嚴行堵禦並咨會湖南會同迅速接捕務期淨絕根株勿留餘孽另片奏平樂陽朔等處均有匪徒滋事業經飭委文武員弁等督率團勇擊散等語著一併飭令分投搜捕毋得因賊已退散稍疏防範尋覆奏前後捕獲匪犯三十七名除左廣秀等五名情罪重大卽在拏獲地方正法並蔣學泰一名業已病故外何其先等二十八犯查明均係道州首匪李魔旺糾邀搶掠由道州衝入灌陽縣屬焚搶村民殺傷差役鄉民多人實係隨從謀叛均各依謀叛不分首從皆斬律押赴市曹處斬傳首示眾杭旺祥等三犯被脅入夥中途逃散並未隨同焚劫合依謀叛案內被脅入夥並未隨同抗拒官兵發新疆給官兵爲奴例發新疆給官兵爲奴見在

地方肅清惟查灌陽縣與楚省道州等處犬牙相錯仍飭縣營協同嚴防下部議從之○甲寅以毓書爲內閣學士兼禮部侍郎銜

由古城領隊大臣遷

○戊午湖南乾州廳苗匪滋事命裕泰等勦辦○辛酉

巡視中城御史志魁等奏編查保甲拏獲吸食鴉片逸犯杜焜請飭交刑部審辦得旨杜景胡卽杜焜著交刑部審辦中城御史志魁給事中路慎莊督查保甲認真著交吏部議敘從來編查保甲爲緝奸要務若奉行故事實無裨益該御史等按冊逐戶點查竟能將前經降旨飭拏逸犯杜焜拏獲並查出人數姓名不符及形迹可疑多起分別辦理可見一經查拏該匪等卽無駐足之處是認真稽查門牌大有實效因思各城各有專轄地面自應一律認真清查毋令奸宄涸匿該巡城科道等必應督飭所屬實力奉行認真查察遇有形迹可疑及門牌人數不符之處立即嚴拏究辦

毋得視爲具文有名無實仍不時稽察丁胥人役等毋得藉端騷

擾需索以緝奸宄而靖閭閻○調麟魁爲刑部左侍郎以桂德爲

盛京刑部侍郎

由左副都御史遷

○辛未湖廣總督裕泰奏查乾州苗匪

起釁緣由實因無賴痞苗假屯田內閒有水衝沙壓及今秋偶被
蟲旱爲名復行合款抗租藉端索詐委非地方官另有激變情事
見在飛咨提督並督飭地方各官激勵兵練示以聲威一面懸賞
購擒各頭目解散脅從不難迅就肅清得旨妥速籌辦毋稍玩延
○甲戌諭軍機大臣等本日已有旨著耆英來京陛見所有兩廣
總督印務及欽差大臣關防均交徐廣縉署理矣徐廣縉經朕簡
用廣東巡撫到任已及年餘於地方一切自應熟習機宜妥慎辦
理惟疆寄重在安民民心不失則外侮可弭嗣後遇有交涉事件
不可瞻徇遷就有失民心至於變通參酌是在該署督臨時加意

權衡體察總期以誠結民情方爲不負委任黃恩彤曾任廣東巡撫自獲咎以來仍留粵省經朕特加六品頂帶交耆英差遣委用該員身受重恩指顧擢用宜如何感激圖報始終出力茲已有旨將該員仍交徐廣縉差委俾該署督遇事藉資指揮可收指臂之助徐廣縉接奉此旨卽告知耆英並傳與黃恩彤閱看以後黃恩彤如果奮勉出力披瀝血誠該署督自能據實保奏候朕施恩儻不知振作藉詞推卸難掩眾人耳目卽著隨時參奏試問黃恩彤能當此重咎否耶○召耆英來京以徐廣縉署兩廣總督欽差大臣葉名琛護理廣東巡撫使部職○是月給河南祥符等十七縣水災口糧並貸鄭州等倉穀緩徵浙江仁和等十五縣新舊額賦並海沙等三場鹽課湖南鳳凰等四廳歉收屯田穀石陝西葭州等七州縣逋賦展緩陝西涇陽富平二縣逋穀○是歲朝鮮琉球

來貢○會計天下民數除福建臺灣府所屬穀數除江蘇未據造
報外各省通共大小男婦四萬二千四百九十三萬八千九百口
存倉米穀三千一百五十萬三千一百五十萬三千一百二十五
石五斗八升四勺